

萬有文庫

第二集七百種

王雲五主編

明詩紀事

(五十)

陳田輯

商務印書館發行

萬有文庫

第二集七百種




商務印書館發行

愛用圖書
明書

詩紀事

(五十)

陳田輯



空軍書庫 軍事學校圖書館



登錄號 414

編號 0831

7560

I.D.O.C.A.F.C.S. LIB.		
	1111	
#810.727		7560

#811.1046 / 7560



明詩紀事卷十四

戊籤

陸鈇十首

鈇字舉之。鄞人。正德辛巳第二人及第。授編修。出為湖廣僉事。歷江西參議。遷山東提學副使。有少石集十三卷。

田按。少石詩多鬱而未暢。錄其音節爽亮者。亦是翩翩雅奏。

秋溪

搖落楓林候。溪光淨可憐。蒹葭明遠浦。鷗鷺下平田。暮艇滄浪曲。晴窗秋水篇。嗟余形役者。訪戴定何年。

開元寺

寶梵開珠藏。龍池但劫灰。何年歸帝子。此地復樓臺。日月金輪轉。笙簫玉宇哀。山靈莫惆悵。拄杖我重來。

學臺秋集

嘉會啓清節。賓筵禮上英。鮮飈洒層宇。流景耀邃甍。候更令始栗。天高氣乃清。時菊布華彩。秋蘭綴玉莖。



敞席爛綺繡。列俎差瑤瓊。廣樂沸中除。靈囂震前楹。泚泚奏周雅。呦呦歌鹿鳴。颯沓珠履集。繽紛星弁迎。升階等魚貫。班坐似雁征。東壁萃文宿。西離觀德型。肅虔若儀軌。溫穆款道情。旅酬旣卒爵。終燕鮮愆程。嗟余信寡昧。接歲忝稱名。倡導謝師訓。切磋惟友生。蓬麻賴扶植。芝蘭藉德馨。屬茲選舉備。欽皇文教成。珪璋薦清廟。麟鳳羅廣庭。棫樸有遺響。菁莪廁頌聲。哲后敦化理。君子茂休貞。所期勤志業。宏樹翊昌明。

武當宮

仙宮積翠凌空起。飛磴盤梯上界寬。五嶽雲霞朝絳節。三天星斗傍朱闌。琅函日靜蘿煙繞。石竇春生玉髓寒。塵士十年思羽翼。洞霄何日乞祠官。

贈白厓子

白厓溪流石齒齒。蘿洞霧合花冥冥。君愛紫泉築堂靜。我攜素琴過月明。東遊天姥涉滄海。南望鍾山賦玉京。歲晚冰霜重相許。碧梧紫竹談心盟。

重過芳洲和王定齋韻

平湖淡蕩淨煙霧。誰人卜築林塘幽。麗日濃花已千樹。截波錦鱗須萬頭。不辭深杯恣佳賞。已覺爽氣凌高秋。鄭谷秦樓幾塵土。曠懷寂寞君爲酬。

郊行

杖藜出郭謝塵事。野曠物態怡心神。鴻濤晴沙意自得。菰蒲小閣花鮮新。江湖滿眼不一醉。歲月如流能幾春。碧草萋萋上煙壠。越王臺暮山鬼鄰。

滕王閣晚眺

樓上煙霞回浦溆。樓中簫鼓暮銜杯。江光半隱漁燈亂。木葉驟鳴山雨來。萬井兵戈餘野哭。千年帶礪依荒臺。古今帝子俱消歇。土燦禰衡空爾哀。

廬山二絕

可惜南唐寺。誰招後主魂。小樓吹玉笛。遺響不堪聞。
參差萬樓閣。恍忽見諸天。僧住香爐頂。半空燒紫煙。

張治十首

治字文邦。茶陵州人。正德辛巳進士。改庶吉士。授編修。以修明倫大典成。擢贊善。進諭德。以翰林學士宣諭安南。未行遽止。擢南吏部侍郎。改北。進南吏部尙書。召拜禮部尙書。兼文淵閣大學士。加太子太保。謚文隱。隆慶初。改謚文毅。有龍湖文集十五卷。

雷禮鐘墟堂稿。文毅奉制及應酬諸作。脫腐遠俗。歸古典則。

藝苑卮言。張文邦詩。如藥鑄鼎。燦爛驚人。終乏古雅。

國雅。張文毅才雄思贍。抽緒錯綵。岌然衡岳之秀。

靜志居詩話。張文肅夜過洞庭詩云。曉發吳閶門。夕渡廣陵汜。日暮江帆遲。洞庭三百里。微風淡無波。明月照天水。隱隱見君山。鐘聲翠微裏。是吳地也。而混於楚矣。酬善長北人。未析南條諸水。注水經。二湖俱以洞庭爲目。誤也。文肅家茶陵。與洞庭湖密邇。豈得以君山屬吳耶。

沅湘耆舊集。龍湖先生詩。體裁正大。詞旨悱惻。以之嗣響西涯。殆無愧色。

田按。文毅嘗議大禮時。附和張桂。與編修孫承恩。廖道南。王用賓俱與纂修明倫大典之列。未滿考。擢贊善。龍湖集中頌羅峯閣老詩。備極推崇。厥後廷推閣臣。世宗持之十日。以南吏部尙書召入。殆猶憶議大禮功耶。五七言律體特饒清音。詩綜專錄七絕。殆未見龍湖全集歟。

白溝河

白溝河水浩浩。昔時戰爭場。今成車馬道。向來棄骨不可收。千古殘魂哭秋草。白日照地寒雲黃。一溪落葉無人埽。世事悠悠甯足論。過客空悲天地老。

贈史給事出判通州

燕京木落秋初深。高雲白雁寒蕭森。玉壺載酒送君去。千里青山愁多陰。我欲贈君綠綺琴。一彈一曲傷人心。海門月出江煙薄。惟見滄波澄碧林。

酬友人

花下疏鐘靜。天涯獨客愁。功名揚子閣。詞賦仲宣樓。杜若滄洲雨。春潮野渡舟。有懷吾共汝。雙鬢愧清秋。
城上

江宿

移舟下極浦。倚岸卽斜曛。淡淡月臨水。微微星出雲。流螢散高影。暗水聚寒蚊。山雨中宵至。淒然不可聞。
湘中憶鄭栗齋憲僉

細雨春帆溼。孤舟江色開。岸花當水出。沙鳥傍人來。綠草湘妃廟。青山帝子臺。湖南霜氣重。遙憶子真才。
觀湘閣與彭大尹宴別

湘江東下應千折。一水中分十里洲。岸坼孤臺浮地出。窗開雙練挂天流。芳蘿春煖生香細。殘櫓風輕落韻柔。萬里未辭孤棹往。一尊聊爲故人留。

聽雪

草閣冬深睡初足。忽聞寒雪下逡巡。空檐窸窣仍兼雨。虛枕蕭蕭欲近人。鴻雁天南無一字。兵戈塞北有驚塵。生涯落魄年將暮。羞見梅花幾樹新。

再寄雙石

湖上寒風吹月明。孤舟官燭照灘聲。美人遠隔青山暮。此夜相思白髮生。客淚暗隨江雨溼。愁心遙度塞雲平。多情不及中流水。日夕悠悠向北傾。

懷真齋江司業因羅子鍾寄去

憶昔追隨供奉地。江淹新賦動長安。離羣卻恨相思苦。直道空嗟行路難。楚日斷雲孤雁遠。白門紅葉萬峯殘。愁心欲逐題封去。江水茫茫秋雨寒。

楊麒一首

麒字仁甫。上饒人。正德辛巳進士。除長樂知縣。改濬縣。徵授吏部主事。出爲福建按察僉事。遷南通政參議。歷應天府丞。南光祿寺卿。改北。擢工部侍郎。進南工部尙書。有司空集二卷。

題隱居草堂

花中池館柳邊橋。卜築溪村幽思饒。對酒放歌消白日。不知城市有塵囂。

敖英十二首

英字子發。清江人。正德辛巳進士。除南工部主事。歷禮部郎中。出爲陝西提學副使。改河南。進四川布政使。有心遠堂稿。

西江志。子發在當時。盛有詩名。人稱之爲敖清江。

田按。子發綠雪亭雜言云。近見一種文家。險澁其語。以爲奇。僻怪其字。以爲古。隱晦其意。以爲深。突兀其體。以爲高。蓋以盤庚爲古文之鼻祖。而淺視史記。漢書。以樊紹述爲古文之宗子。而下視韓柳。歐蘇。鯨吞鯨抹。牛鬼蛇神。瑤翻碧豔。鬼眼傾耳。揮霍自恣。居之不疑。噫。弊也甚矣。蓋亦不隨時好爲步趨者。詩亦有標致。

憶湖南舊遊

孤帆忽西邁。超忽憑虛遊。江風出斷岸。細雨菰蒲秋。美人隔湘浦。遺我珊瑚鉤。安得雲間鴻。一寄心之愁。

長干行

鴨嘴岸低春水滿。水邊膩綠蒲芽短。誰家兒女採蒲芽。髮溜寶釵金鳳斜。娉婷自信心如鐵。坐閱江流千萬折。歸來結鏡思獨苦。露滴風檐月亭午。

下第南歸

黃金臺下客。去去復奚疑。僮僕憎行李。居人勸酒卮。九江春草綠。孤棹北風遲。卻笑無鹽女。年年學畫眉。

野望

望中齊魯曠。一雨洗春柔。山影凌波亂。花光約樹浮。羣妖仍瀕洞。孤棹正夷猶。南斗江湖外。何人倚劍愁。

雨花臺

雨花臺上無花雨。此日登臨踏古苔。清梵不聞重說法。亂山依舊對銜杯。六朝蔓草天邊去。萬里江流席

下來回首長干笳鼓動。城南燈火映樓臺。

連雲棧

朝朝木末行。路險色惆悵。絕壁何蒼蒼。猿聲在天上。

秋興呈邊華泉

池頭一雨送新涼。小坐茆亭月近床。和得竹枝三百首。西風無雁寄瀟湘。

出郊

春事不知還幾許。城南今日探芳菲。鳳凰臺前好春酒。醉到日西騎馬歸。

宿烏鼠山野館

西風無伴獨登樓。烏鼠山空鴻雁秋。家在五湖煙水外。何人燈下說邊頭。

毛女圖

毛女翩翩骨已青。往來西華弄寒星。無端回首人間世。風雨年年怨茂陵。

歸田志喜

江心桃竹可爲杖。拄杖還山不受呼。要與林逋同放鶴。六橋春水隔西湖。

昭明太子蓮池

年年池上蓮花紅。啾啾怨鬼嘯青楓。臺城同泰久蕪沒。殘僧猶打南禪鐘。

張袞三首

袞字補之。江陰人。正德辛巳進士。選庶吉士。授監察御史。復改編修。歷侍讀。諭德。進侍讀學士。遷太常卿。左遷南太常少卿。就遷光祿卿。有水南集十一卷。

田按。水南絕句極有風致。

雪後放舟淮河

風帆遠下疾於鳥。萬里長淮帶雪流。岸上好山如待客。可無人與畫江洲。

和顧東橋新營息園

每多幽興在濠梁。曲曲京江見野塘。風磴雲門時隱見。有誰題作浣花莊。

閒情示邢道士

秋蘆江上白紛紛。鶴渚鳧汀杳莫分。寄語水雲邢道士。卻從何處謁仙君。

張鳳翀一首

鳳翀字岐山。甯州人。正德辛巳進士。官南監察御史。

書懷十首錄一

雲和開繡戶。錦韉住誰家。凝思久無語。數徧砌前花。

田按岐山自注云。正德十五年。予備數甲榜。時甯藩不軌。上南征。駐蹕南京。予輩俟廷對於京師一年有餘。同列拈杜句感時。花濺淚。恨別鳥驚心。爲韻。因賦短章。考此年爲庚辰。越歲廷對爲辛巳。凡州縣志多稱此榜進士爲庚辰者。皆未詳此時事也。

王同祖二首

同祖字繩武。崑山人。正德辛巳進士。選庶吉士。授編修。以事罷歸。起原官。兼春坊校書。進南國子司業。有太史詩集六卷。

弇州山人續稿。司業詩。采建安六季之才。而歸開元大歷之格。

梅花草堂集。繩武宏博。爲文章。操紙筆立書。融暢爾雅。居然合作。在朝多所建白。識者謂有出入將相之略。弱冠登籍。垂三十年。立朝者僅五閱歲。卒以譴死。天下惜之。

田按。繩武以世宗久居西苑。不視朝。時有宮女楊金英之變。疏請還大內。改元。忤旨奪職。放歸。弇州序司業集。謂集中疏多國家大計。嘗請祀薛文清於孔廟。申明太學四事。九廟災。請以春秋哭災。漢氏改服。詣陵題主。倣日中反虞之義。不得以吉禮從事。又謂宗廟石室藏主爲宗祐。公羊高曰。主藏廟室西壁。以備火災。漢儀藏主西牆。堦中。堦卽石室也。北虜猖獗。疏請使使齎遺金帛於別部勁虜。俾爲外援。得間則以一軍出雁門。一軍出居庸。左右犄角。其語甚壯。慨然以賈長沙。劉中壘。陸忠州自居。今檢明人選本。無及繩武文者。錄其詩。附識於此。

吳門遇邵仲德

三月逢君吳子城。百花洲上倉庚鳴。晴川著雨波汎汎。野館落日春冥冥。樽酒欲傾還惜別。逐臣相對自

關情長沙此去應無鵬。宣室何時召賈生。

張比部子儀攜酒見過分得年字

白水青山春可憐。野塘花竹淨娟娟。東風門巷多芳草。落日江湖有杜鵑。高臥馬卿愁病渴。長齋蘇縉愛逃禪。卽看載酒尋盟處。小閣秋雲已判年。

吳廷翰四首

廷翰字崧伯無爲州人。正德辛巳進士。授兵部主事。改戶部。吏部。歷員外郎中。出爲廣東僉事。改浙江。遷山西參議。有蘇原先生集二卷。

田按蘇原七律疏爽。集中佳句。如自來說法青牛叟。雙去吹笙白玉童。管仲臺前春草亂。黃公石上暮雲生。念子久傷豺虎地。使人愁對鷓鴣臺。峽口草生銅柱沒。廟前月出石牛寒。湖上青山芳草夢。渡頭黃鳥落花情。滿浦葉聲飛晚照。隔江峯影落秋雲。滿地清秋雲片片。三更脩竹月娟娟。久病忽驚詩卷瘦。老懷難借酒杯寬。皆可誦也。

寒東王繩武陸伯載

北地時節苦不早。不謂四月寒見侵。風吹薊門日色薄。雲入西山雪意深。邊城蕭蕭鳴戰馬。野田啄啄下饑禽。可憐寺裏淮西客。幽獨傷神青竹林。

送溘涯太守入覲

此邦爲政多休暇。山水何須羨永嘉。齋閣留賓開一榻。湖亭對酒得孤槎。憶歸春日牽楊柳。送別寒城隱菊花。清問祇今勞側席。使君何以答重華。

逸山魯君隱居

闕下歸來今忽老。偶尋此地作幽棲。茅齋寂寞緣孤徑。野樹參差帶小溪。酒旆斜連官渡口。釣船常在石橋西。槎亭最喜相隣近。短杖從今得共攜。

白頭翁

點點綠殘荷葉渚。枝枝紅映蓼花洲。可憐秋水清如許。閒與幽禽照白頭。

何棟一首

棟字伯直。長安人。正德辛巳進士。授河南道御史。改宜興知縣。遷順天通判。歷工部郎中。進右通政。太僕卿。以左僉都御史巡撫大同。左遷四川參議。用薦起右副都御史。提督薊州。進兵部侍郎。擢右都御史。有太華集。

望湖亭

丹磴入青靄。瑤亭俯翠巒。晴軒一以眺。湖漲正瀾漫。波影含雲細。荷珠滴露圓。須臾明月上。坐對水晶盤。

李默一首

默字時言甌甯人正德辛巳進士選庶吉士改戶部主事歷兵部員外吏部郎中以事謫甯國同知屢遷浙江布政使入爲太常卿掌南國子監事擢吏部侍郎進本部尙書兼學士加太子少保爲嚴嵩趙文華構陷下獄瘐死隆慶中復官萬歷中謚文愍有羣玉樓藁七卷

田按文愍羣玉樓稿有上三宰相書曰比者降發中之詔修翊戴之功執事首膺異數進秩諸侯可謂曠世雋談矣然外內譁然不浹衆懷其說有二小人曰相公汰冗食正典禮義不假於君親而乃自利其爵君子曰相公革命之臣無利之心雖然三子並拜而宮掖乖五侯並封而武氏橫相公不鑒功名自此去矣夫是命也執事謂盡出上旨哉卽不過左右憑藉以階寵耳觀其敘列吾黨不及三四而此輩已居八九則其情狀先已敗露矣蓋爲楊廷和蔣冕毛紀以定策功封伯爵發也三人卒能固辭文愍直諫亦有足多者集中文學步昌黎不拘李何成說詩則頗傷率易

江上訊故知

憐君四十不稱意獻賦金陵仍未收爲客敝裘曾貰酒經秋雨幾登樓釣鰲無計悲公子埋劍何年射斗牛我亦長沙留滯久江籬汀芷共牽愁

童承敍二首

承敍字士疇一字漢臣沔陽州人正德辛巳進士改庶吉士授編修進侍講歷中允洗馬國子司業左春坊左庶子有內方集十卷

靜志居詩話庶子與張文邦廖鳴吾號楚中三才永陵以從龍侍臣遇之詩篇比廖差優

湖北詩徵傳略內方集多佳句可錄。如忽抱澧關思。坐乘秋水來。林皋停返照。樓閣動新涼。衰晚饒詩意。清貧乏酒錢。仲宣詞賦人爭誦。平叔風流自可憐。門前自擬題凡鳥。天上甯知聚德星。坐愛蘋風生水閣。臥看林影落繩床。皆清峭拔俗。

宮詞

三三兩兩不知愁。結束羅裙學打毬。傍晚忽聞天樂近。分明只在殿東頭。

江漢歌

清江抱村村樹齊。水風不動浦雲低。嬌女刺船深港裏。聞歌只在芰荷西。

倫以諒一首

以諒字彥周。南海人。正德辛巳進士。選庶吉士。歷吏部郎中。進南通政司右參議。有石溪集。

海珠寺別李三洲王青蘿

兩岸西風吹白蘋。三城煙火隔紅塵。天涯黃菊雙蓬鬢。海上清尊幾故人。謀國計從窮處拙。倦遊心向暮年真。羅浮東去扶桑近。黃木灣頭好問津。

廖道南一首

道南字鳴吾。蒲圻人。正德辛巳進士。改庶吉士。授編修。屢遷侍講學士。謫徽州通判。尋復職。有玄素子集。

殿閣詞林記嘉靖時每遇經筵日講召講官顧鼎臣謝不及臣道南蔡昂賜賚無算臣道南悉紀以詩賜枇杷菓詩云炎日殊珍出尙方賜來猶帶御園香珠丸雲筐承優渥玉液霞罌敢自嘗賦擬上林風韻別頁綠南國露華芳翠箒兩賜同袍士蕙圃蘭皋倍寵光賜鱗魚詩云暑雨經旬溼不開雪鱗冰艦自南來御庖珍饌傳中使講幄金盤出上裁薦鮪未須歌寢廟釣鼈何必羨蓬萊素餐忝竊慚無補魚藻空懷絕代才

藝苑卮言廖鳴吾詩如新決渠浮楚濁泥一瞬皆下

田按學士在世宗朝頗蒙優眷纂修明倫大典成進侍讀在經筵講洪範稱旨其說具載實錄嘉靖八年元夕應制撰燈詩十五首以進又撰泰神殿禮成感雪賦團邱載祀慶成九章聖主光闕陽翠嶺賦南巡江漢賦景雲徵烈四頌皆邀睿賞自徽州賜環帝親灑鍾粹宮詞命和賜金綺有差生平著述甚富撰楚紀六十卷續黃泰泉翰林記爲殿閣詞林記二十四卷玄素子集五十六卷詩句製字輒不稱其名

登赤壁亭

亭傍石岩開風鳴萬樹哀人閒不知去鳥倦忽飛來江勢平吞閣山形曲抱臺雲林秋色霽眞自可幽懷

周祚三首

祚字天保紹興山陰人正德辛巳進士除東阿知縣改來安擢兵科給事中改工科有定齋集十五卷

翠玉樓集定齋文酷慕西京賈疏達節去雕去腐時復爲燕趙慷慨悲歌之狀詩淡者似建安沈鬱復似少陵而瑰心奇氣若河流下龍門積石奔激不得瀉風觸木怒號撒旋漂擊已而噫氣冷然故攬其詩若文而志可悲也

田按。天保致李空同書云。往寓幽燕。有攜空同集過予者。予抱而讀之。再三而歎之。嗟夫。世有是人。予不得而見之。予豈人也哉。予年四十有四。白日易下。逝水不返。墮弱苟且。以俟其老。將奈何也。求虞翻。趙焯。陸佃。放翁於鄉之遺書而讀之。吾意未覺其有當也。登會稽之山。想黃河之流。浮雲而馳。征翼東向。又不能不空同之思。忼慨幾於泣下。誠以惜時不如立名。慕德不如勵行。追古不如就今。執文不如親炙。此王粲有依劉之誠。張敏有夢惠之歎。古今之所共親。烈士之尤甘心也。空同覆書云。僕少壯時。振翮雲路。嘗周旋鸞鷟之末。謂學必的古。苦心無益。又謂文必有式。然後中諧音度。如方圓之於規矩。當是時。篤行之士。翕然臻向。弘治之間。古學遂興。而一二輕俊。恃其才辯。假舍筏登岸之說。扇破前美。稍稍聞見。便橫肆譏評。高下今古。謂文章家必自開一戶牖。自築一堂室。謂法古者爲蹈襲。式往者爲影子。信口落筆者爲混其比擬之迹。而後進之士。悅其易從。附唱答響。風成俗變。莫可止遏。而古之學廢矣。僕竊憂之。然莫之敢告也。又每竊歎獨立之鮮。勇往之寡也。今足下既有同聲之應。又相求也。僕安敢終默也。且人情未有不忽近而務遠者。何也。知其實者少。而徇乎名者多也。世遠則論定持定。采名則曠世相慕。故漢文帝拊髀思頗。牧而不知李廣。魏尙者以其近也。近則疑。疑則實昧。實昧則忽之矣。斯時俗之重悲也。今足下於僕同時最近。涉疑而不疑。又無傾蓋之談。接衽之雅。乃一旦走千里之使。聲應而氣求之。僕以是知足下立之獨而往之勇也。以是而的古。何古之不的矣。天保詩有氣格。而少風趣。文過詩遠甚。余愛二書情詞斐然。故節而錄之。一二輕俊。蓋指大復。君采也。

擬青青河畔草

春日長安陌。落花何脈脈。陌上草青青。行人那復停。歌臺臨大路。相思春日暮。寶騎金作鞍。遙遙花裏度。去時鸞鏡臺。照郎未曾開。青天挂月明。弦望得歸來。

王雲谷以溪山深雪圖貽我六月展玩想憶不忘時雲谷西遊乃詠歌圖右以託意云
雲谷詩人苦詩癖時復工畫窮其力平生豪縱出萬夫不受文詞相促迫憶昨贈我溪雪圖山石半暝天
模糊中有堅冰百丈長下垂大壑通江湖是時六月朱夏永萬里炎蒸骨殊痛遂令寒風生我堂坐間賓
客毛皆聳青松挂壁牛已僵溪流欲流雲不揚茅堂盡亞天姥下孤舟忽出瀟湘傍王君王君神仙侶一
生好古心亦苦技兼鄭監名獨著祁岳韋偃何足數近聞騎馬西入秦秦地山川三輔鄰他時定寫皇圖
會猛欲題詩向渭濱

楊花

三月楊花暮看花并送春茫茫渡江去白日易愁人

謝蕢一首

蕢字維盛閩人正德辛巳進士除□□給事中以議大禮廷杖出知太平府未上官卒隆慶初贈
太常少卿有給諫集

楊妃春睡圖

玲瓏樓閣長生殿紅塵遠隔輕風薦寶鴨香微午漏沈翠箔珠簾語雙燕深宮無事白晝長銀床冰簟參
差光海棠欲睡嬌無力阿監雙雙扶不得沈香蝴蝶夢中飛飛來上苑戀春輝東皇有意醉傾國獨領春

風歸禁闈。玉顏如花。恩如海。千秋萬歲終不改。漁陽鼙鼓動地來。花落黃沙真可哀。

楊言一首

言字惟仁。鄞人。正德辛巳進士。除行人。擢禮科給事中。以言事廷鞫。謫宿州判官。遷溧陽知縣。歷南吏部郎中。再謫彝陵知州。累官湖廣參議。有集。

田按嘉靖六年。錦衣百戶王邦奇言哈密事。請誅楊廷和彭澤。下部議未覆。邦奇復誣大學士費宏。石塘陰庇廷和。詞連廷和子主事愔等。將興大獄。惟仁抗疏曰。先帝晏駕。江彬手搢邊軍四萬。圖爲不軌。廷和密謀行誅。俄頃事定。迎立聖主。此社稷之勳也。縱使有罪。猶當十世宥之。今既以奸人言罷其官。戍其長子。慎矣。乃又聽邦奇之誣。而盡逮其鄉里親戚。誣爲蜀黨。何意聖明之朝。忽有此事。書奏。帝震怒。并收繫惟仁。親鞫於午門。備極五毒。折其一指。惟仁有詩云。云何捐臂指。率爾忤雷霆。紀其事也。

玉莊驛

春仲一到此。郊原入望遙。草侵山路細。溪迫漲痕高。驅策煩羸馬。風塵闔敝袍。乾坤嗟孟浪。吾義更何逃。

任瀉一首

瀉字元朴。堂邑人。正德辛巳進士。官監察御史。有石麟集。

土木驛

百年土木蕩龍沙。九月風塵擁使車。白日猶餘征戰色。空山愁絕聽胡笳。

吳檄一首

檄字用宣。桐城人。正德辛巳進士。除襄陽推官。遷戶部主事。歷兵部郎中。出為湖廣參議。歷山東、雲南副使。遷陝西參政。有皖山集。

春日過張侯亭園

五侯臺榭競芳菲。三日花深車馬稀。絃管不隨流水奏。綺羅應化暮雲飛。空聞玉饌分天府。曾覩金葩捧御幃。借問樓前桃李月。從來此地幾人非。

列朝詩集李開先游海淀詩序云。嘉靖乙未三月。王遵岩謫判毗陵。武選吳皖山檄。呂江峯高。熊南沙過。翰林唐荆川順之。陳后岡東。禮部張少室元孝。李克齋遂。及予共八人。饒之海淀。望日出阜城門。至則荒涼殊甚。蓋張昌國以癸巳罹禍。已三年矣。亭臺傾圮。惟水聲潺潺。不異舊時。酒酣賦詩。皖山先成。意高詞雅。不減唐之名家。次日。夏桂洲遂劾奏張。李二司屬無事慢遊。下獄未久。七人相次罷謫。皖山幸而獨免。詩卷歸予手。事如隔世。而人多下世。愴然作序。不惟感諸友之易銷歇。而且歎大臣之善傾陷也。嘉靖初海淀之獄。與蘇子美諸人監院飲酒之事。大略相似。貴溪恃寵恃橫。一至於此。西市之禍。豈不幸哉。昌國在孝宗朝。科道交章論劾無虛月。欽命置酒陪禮。傳諭守科及該道接本者俱赴席。臨時又賜御物助杯盤。翌日謝恩本上。而劾本亦上矣。故此詩有天府玉饌之句。

田頊一首

頊字太素。尤溪人。正德辛巳進士。歷禮、兵二部郎中。出為湖廣僉事。遷□□副使。有柘山集一卷。

四庫總目。頊詩頗爽朗。蓋沿前七子之流波。有意規撫唐人。而模擬未免有迹。列朝詩集。副使乞歸。以文章自喜。多所著述。

寄玉溪舅

廉水扶桑北。石城句漏西。吏情甘散地。春色在扶藜。榔葉斜侵屋。江魚逆上溪。飄緇記蠻府。淚應暮猿啼。

陳大濩一首

大濩字則殷。長樂人。正德辛巳進士。歷官思恩府同知。有雙溪集。

擬陶還舊居

六年客京邑。鬱鬱但懷歸。今日歸故國。我心愴以悲。溪山雖則是。室廬半已非。出門訪鄰老。往往罕復遺。但見門前柳。含情尚依依。回看百年內。倏若車輪推。老者日以死。壯者日已衰。但當與鄰曲。杯酒聊共揮。

王洙一首

洙字崇教。臨海人。正德辛巳進士。除汝州判官。歷官廣東參政。

鄔子驛

彭蠡深無地。蒼波闊有天。晚山西落日。古渡北歸船。樹遠煙初散。帆高風正懸。孤舟憐去住。翹首思茫然。

蔣泮一首

泮、字良潔。僊居人。正德辛巳進士。授工部主事。歷員外。進郎中。

養病疏不行志感

抗疏辭明主。紆詞乞病身。尊鱸空入夢。簪紱苦羈人。東嶺煙花好。南檐鳥雀馴。何時破蒼蘚。把酒席芳茵。

鄭一鵬二首

一鵬、字九萬。莆田人。正德辛巳進士。選庶吉士。授戶科給事中。改吏科。以議大禮廷杖。桂萼議令科道互相糾劾。執奏非事體。不受詔。再受杖。罷歸。隆慶初。贈光祿卿。

將命荆襄道中書懷

江漢在何許。我馬去何遲。豈不事鞭策。徘徊有所思。辭親遠行役。歲晏屢差池。憑高恣遠眺。仰睇白雲馳。白雲散還合。遊子歸何時。

感懷

林下碧蘿垂。陰崖紫苔長。欲取鳴琴彈。坐聆松風響。

洪珠一首

珠、字玉方。莆田人。正德辛巳進士。除戶部主事。歷官應天府尹。

題畫

柴門欹側對流水。石磴礧崑點落花。一壑白雲秋欲老。紅塵飛不到山家。

吳文之二首

文之字與成。吳人。正德辛巳進士。改庶吉士。

答德深兄

池草頻生句。江魚不寄書。春來小樓興。應似舊時無。對月開新札。穿雲憶故廬。忽聞添米價。千里獨愁予。

聞黃季行消息

試檢來書憶故人。此生吾已失元賓。詩篇近寄何能及。消息初聞疑未真。病裏無家行橐盡。夢中有記玉樓新。曲江零落花千樹。北望長安爲愴神。

王璜一首

璜字廷實。濬人。正德辛巳進士。除陝西道御史。有大伾子集。

談遷棗林雜俎。濬縣御史王璜雲中歌八首。一曰。小王子來打圍時。自稱北狩產龍姿。墩上老軍莫相信。英皇元不納胡姬。

感事

一戰不惜布衣死。堂堂肉食應含羞。納牟山下藏靈劍。夜夜龍光射斗牛。

田按。此詠普安王鐸事也。鐸。普安諸生。學孫。吳兵法。弘治中。貴帥進討蠻寇。鐸兄以尺籍當行。瀕行而病。鐸代之行。及戰。官軍

敗。鐸死之。此事黔志未載。當補錄。

陳講一首

講字子學。遂甯人。正德辛巳進士。歷官副都御史。有中川如鳥二集。

崆峒

欲訪飛仙閣。先臨問道宮。亂雲交密竹。斜日下危峯。木落層樓出。天高一鳥通。鼎湖龍去遠。巖壑自秋風。

朱子和一首

子和字□□。瀘州人。正德辛巳進士。歷官浙江僉事。有初溪集。

歸雲閣

路轉涼飈回。松古石泉落。竹外鳥不鳴。歸雲暮投閣。

邵經邦一首

經邦字仲德。仁和人。正德辛巳進士。除工部主事。改刑部。進員外。以建言廷杖。發鎮海衛充軍。有

宏藝錄三十二卷

四庫總目。經邦以講學自任。嘗採古今論學語。發明其旨。爲宏道錄。又刪綴諸史。爲宏簡錄。所著詩文。則別爲宏藝錄。經邦自作誌銘。所云三宏集成。譬聞聾鳴者也。經邦上武宗疏。及中興保治。日食建言諸疏。皆慷慨激烈。足以見其志節。其他詩文。則

類皆抒寫胸臆。不屑屑以研鍊爲工。卷首藝苑元機七十三條。專明作詩之法。以嚴羽詩有別才非關學之說爲不然。且謂清廟緝熙。莫非至理所寓。未可不謂之詩人。惟狃於習俗。謂與經生不同。故往往黏皮帶骨。觀其持論。其宗旨可知也。

灑水驛與巴鈍齋憲使宴

婺女星前瞻使節。斗牛槎底汎行舟。張騫自覓河源去。徐福從招海外遊。綺席玉杯光照夜。繡衣霜簡氣橫秋。來朝共擬尋天姥。白鶴脩脩下九州。

胡森一首

森字秀夫。湯溪人。正德辛巳進士。歷官南鴻臚卿。有九峯集。

金華詩錄。九峯詩頗有標格。如身世孤舟隨處繫。江湖白髮共愁長。澗戶苔封時遇鹿。石牀客少只留雲。句外有神。

九日遊觀音山次劉紫巖韻

萬里江流天際來。無邊秋色上虛臺。荒煙落日迷漁艇。翠竹黃花照酒杯。搖落自深騷客思。羈棲空老杜陵才。謝公不負東山興。千古幽懷一笑開。

趙兌一首

兌字鷺洲。內江人。僑寓上元。正德辛巳進士。官御史。罷歸。起爲常州知府。歷官參政。

題謝子隱畫

峯回溪轉露山家。竹槿編籬整復斜。中有讀經人靜坐。野風吹雨落藤花。

彭汝寔一首

汝寔字子充。嘉定州人。正德辛巳進士。除吏科給事中。請改教職。奪職閒住。有得山堂集。

凌雲寺

誰從雲際結孤亭。萬斛蒼煙倚翠屏。二水遠浮天影白。九峯高擁樹痕青。佛煙渺渺空中散。估艇紛紛雨後停。新月送人涼霧起。石洲古渡未全冥。

浦瑾一首

瑾字文玉。無錫人。正德辛巳進士。除麗水知縣。有桂巖集。

閒居漫興

草堂幽事許誰分。石鼎煎茶隔戶聞。長日如年雙燕語。晴風似酒百花醺。輕莎新展青絲毯。濃墨閒書白練裙。稍待谿南荷芰滿。扁舟十里看紅雲。

林汝永一首

汝永字君修。莆田人。嘉靖壬午舉人。累官長蘆鹽運使。有南崧集。

初夏集湖園有懷退齋弟

江南四月麥秋後。正是濛濛梅雨時。可惜池塘芳草滿。一春閒過已無詩。

王汝礪一首

汝礪字若金。金華人。嘉靖壬午舉人。官滄州知州。

擬相思行

鬱鬱連理枝。關關相思鳥。緬懷湘水人。此夕愁多少。

陳東一首

東字南塘。零陵人。嘉靖壬午舉人。除井研知縣。改龍泉。

黃葉渡

黃葉渡頭風。愚溪橋下水。日斜晚涼生。漁歌數聲起。

李松一首

松字鶴巢。曹州人。嘉靖壬午舉人。除沙河知縣。改開封教諭。

流民歎

惻惻背鄉井。遲遲行道側。凶年託此身。樂土是何國。追逐惟妻孥。可憐各菜色。聞道大河南。人家富黍稷。負擔不能達。誰知我心亟。裹糗臨風餐。蒙塵衣盡黑。日暮宿荒郊。愁吟聲唧唧。人生信多艱。無家最可盡。

風急走浮雲。林空無定翼。透迤家漸遙。舉首望天北。

錢文爵一首

文爵字滌齋。無錫人。嘉靖壬午舉人。官南太僕丞。

過石瀨山莊次鄭平山韻

地擅千秋勝。泉流三徑分。澗芳生暮色。石壁亂春雲。人意花同愜。巖香鳥共聞。到來餘遠思。蘿月綠紛紛。

祝時泰一首

時泰字汝亨。侯官人。嘉靖壬午舉人。歷官戶部員外。德府左長史。有九山集。

過縉上人蘭若

東林秋入社。還叩遠公扉。地靜鈴相語。風高旛自飛。山留說法座。雲護定僧衣。欲識空中相。鐘聲繞翠微。

明詩紀事卷十五

戊籤

王教一首

教字庸之。祥符人。嘉靖癸未第二人及第。授編修。遷侍讀。歷左諭德。國子祭酒。進南兵部侍郎。有中川遺稿三十三卷。

巴江詞

皎月上巴山。影入巴江裏。不見郎舟來。江流去瀾瀾。

徐階六首

階字子升。松江華亭人。嘉靖癸未第三人及第。授編修。以論孔子廟制謫延平推官。遷黃州同知。擢浙江按察僉事。進江西副使。召拜司經局洗馬。歷國子祭酒。擢禮部侍郎。改吏部。進禮部尚書。加太子太保。進少保。兼文淵閣大學士。參預機務。再進柱國。兼太子太傅。武英殿大學士。加太傅。改吏部尚書。加太子太師。進少師。建極殿大學士。卒贈太師。諡文貞。有世經堂集二十六卷。

千慎行穀山筆塵。分宜相嵩既殺貴溪。逐諸城。專任二十年。獨華亭與之左右。勢且不免。會吳中有烏寇。華亭既卜宅豫章。伴爲避寇之計。有司爲之樹坊治第。附籍江右。又與世蕃結親。江右士大夫。皆講鄉曲之誼。於是分宜坦然不復介意。已而謀逐分宜。世蕃誅死。卽鬻南昌里第。解江右之籍。

國史唯疑徐華亭初以爭孔子祀典謫外。斥爲佞。鏗柱識之曰。徐階小人。永不敘。久亦遂忘之。其自江右督學改宮寮。賴馮恩力。馮時謫戍過南昌。代都御史何某草疏達夏桂洲。因被內擢。躋台輔。謂君相能造命。非歟。今人處謫官。邑邑不樂。徐華亭延平詩云。俗樸到庭文牒少。山深入饌蕨薇鮮。自注。予往歲謫延平。樂其土俗。有移家之約。窺此老襟度。正復超然。田按。文真相業。以威福還主上。以政務還諸司。以用舍刑賞還公論。雖不盡副。自是名語。永陵修玄。非青詞不能結主知。又與相嵩共事。權譎獲濟。史稱任智。不其然歟。世經堂集爲所手定。一切青詞致語。刪削殆盡。雖不以詩名。而入格之篇。爛復俊爽。

詠古

漂母昔進食。慷慨不願酬。淮陰千金賜。高誼激頽流。悲哉一失職。快快生異謀。隆準多忌猜。國士諒所仇。一飯有厚直。高勳無荒邱。感彼君臣間。涕下不能收。

送潘子芳赴東陽簿子芳者少宗伯崔公壻也

我初識君自崔公。珠玉照坐挹清風。得君高文不能薦。俛首簿領山縣中。人生仕宦如艇子。東西總在風濤裏。篙工舵師好身手。要使風濤爲我使。古今貴賤同一邱。獨有賢者名常留。如令人頌東陽簿。此事應輸君一籌。

題西莊卷

問訊高人第。城西莊更幽。竹深秋靄合。花重夕陽留。澗水斜通泖。雲峯曲抱樓。不知塵世外。何處有丹邱。

登金山作

嶺樹鬱重重。江流接太空。下臨三楚盡。平挹兩都雄。寺古仙靈祕。潮生海脈通。無勞問天塹。萬國正來同。

送客赴雲中

霜月滿層城。憐君事遠行。平沙百戰地。羸馬一書生。漢戍雲邊色。胡笳雪裏聲。相思堪涕淚。送別若爲情。

送少傅木齋先生謝公致政

旌蓋催晨發。煙霞入望新。寵恩黃閣重。心事碧山親。司馬真辭位。留侯早乞身。紮維虛夢寐。瞻望渺參辰。大節全終始。神功付隱淪。鳳飛元快覩。鴻舉定誰馴。柳暗龍泉雨。花明蘿壁春。笑歌淹日月。步履出風塵。勳業清朝範。文章弈世珍。高標振遐軌。懷企獨傷神。

潘恩二首

恩字子仁。上海人。嘉靖癸未進士。授祁州知州。改鈞州。遷南刑部員外。出爲廣西提學僉事。遷山東副使。以事謫廣東河源典史。累遷浙江參政。進布政使。以右副都御史巡撫河南。召拜刑部尙書。改左都御史。贈太子少保。諡恭定。有笠江集。

張時徹芝園定集笠江詩型範自然體裁各適

田按尚書詩有陳色錄其少新穎者

樓子石

疊磴鬱棱層。日色籠雲氣。天迴石鏡光。風捲珠泉沸。仙人好樓居。飛駟下來未。

三入蜀過灩澦

灩澦已如象。川行良自傷。一官淹絨冕。三入戀舟航。大浸蛟龍鬪。天風鶴鶴翔。嗟嗟遠遊子。能不念垂堂。

鄭曉三首

曉字窒甫。海鹽人。嘉靖癸未進士。授兵部主事。以爭大禮廷杖。改吏部。歷郎中。以忤嚴嵩謫和州同知。遷太僕丞。歷南太常卿。召拜刑部侍郎。改兵部。兼副都御史。總督漕運。入為吏部侍郎。遷南吏部尚書。改右都御史。再改刑部尚書。隆慶初。贈太子少保。諡端簡。有集十二卷。

田按端簡博通掌故。所著吾學編。今言九邊志。悉可奉為典要。詩非所長。紀事之篇。風藻不匱。

諸將三首 嘉靖 辛丑

胡馬南驅摧紫塞。材官北面守黃河。風塵不斷千山動。渾脫相牽一葦過。
胡兒落雁誇鳴鏑。元帥椎牛賽纛牙。冀北於今驚趙魏。河西且莫問瓜沙。

驃騎未搜青海賊。匈奴還結黑山奚。朱旗夜躍雙城破。白骨秋燐萬鬼啼。

朱廷立二首

廷立字子禮。通山人。嘉靖癸未進士。除諸暨知縣。入爲河南道御史。歷南太僕少卿。擢工部侍郎。改禮部。有兩厓集十一卷。

懶谷

山盡若無去處。青松翠竹交加。風動茶煙初起。隔林知有人家。

山樓短述

病暑山城一月餘。竹床茗碗爲驅除。澄心自是延年術。誰向名山借道書。

屠大山一首

大山字國望。鄞人。嘉靖癸未進士。授合州知州。遷南刑部員外。出知吉安府。歷山東按察使參政。福建布政使。以右副都御史巡撫湖廣。召拜工部侍郎。以原職再撫湖廣。進兵部侍郎。兼僉都御史。總督湖廣川貴軍務。改南兵部侍郎。巡撫應天。與倭戰失利。下獄。黜爲民。有集。

甬上耆舊集。屠長卿曰。公歸田後。與里中故人縱飲。酒酣以往。援筆爲曼歌。了不求工。而往往神來。非詞人嘔心枯影而得。

青州瀑布泉歌

山神愛奇天帝憐。倒捲海水懸山巔。海神欲爭不敢言。怒觸山頂通黝淵。白龍騰攫挂紫煙。飛聲兩道雲光鮮。山神受聒忘晏眠。徒置十里蒼崖肩。坐令林麓偉麗捐。頗費探討添煩冤。我來聞此心冷然。斂裳欲訪塵霧牽。望中彷彿璫幕褰。冰肌玉骨爭清妍。誰能移還大道邊。報爾萬鎰黃金錢。

李仁十首

仁字元夫。東阿人。嘉靖癸未進士。授行人。擢吏科給事中。累官兵部侍郎。有吾西遺稿。

海岳靈秀集。吾西清婉和粹。有中唐餘韻。

田按。吾西詩格軒爽。音節清脆。當時山左盛稱伯華。懋欽爲二李。何獨遺此元珠。

湖行書所見

葭菼煙中界。茅檐水上村。漁舟常繫柳。鷺渚不離門。愛爾機心息。知予野性存。炎天供遠役。惆悵與誰論。

過高郵湖

郡接三吳會。湖涵萬派流。樓虛無地著。岸闊與天浮。細柳魚蝦市。香蘋雁鷺洲。孤舟蕩超忽。真得水雲遊。

送劉竹瀧赴西甯

曲水高旗駐。離筵急管催。驅車川路永。吹角隴雲開。青海霜鷗擊。流沙天馬來。百年番漢地。坐見古風回。

別約齋龔丈

同作羈栖客。如何復轉萍。高人甯避毀。吾道本無爭。草綠思公子。雲停悵友生。幾時清禁地。端簡笑相迎。

出塞

羽檄來青海。朱旗向磧沙。匈奴猶牧馬。主將敢言家。天接胡塵暗。山連漢戍斜。鐵衣寒不寐。徹夜聽鳴笳。

朝天宮東麓亭

飛閣東巖麓。遙憑修竹林。河山窗裏盡。宮闕望中深。晞髮迎朝日。鳴琴坐夕陰。便當從綺季。一洗市朝心。

寄張五臺

明時張博望。遠佐霍嫖姚。直以戎機重。甯辭邊地遙。油幢張晚甸。刁斗入寒宵。雄劍衝星斗。機槍觸處消。

疊川雨中宴集

小亭張畫燭。高宴紫薇衙。細雨江雲溼。微風徑竹斜。青衣行琥珀。翠袖拂琵琶。歸路衝泥怯。籠街引絳紗。

澠池重九

函谷關西山路長。會盟臺北野雲涼。雁傳朔氣清霜苦。地近寒流晚稻黃。木落前川還獨往。花開別縣又重陽。薊門直上三千里。一夕歸心鬢欲蒼。

慶陽

慶陽山郭屹中天。勢壓胡兒不近邊。何事白狼鞬未入。至今青海箭猶傳。城頭帶甲嘗防虜。套裏連營自

控絃漢將秦師空拊髀。令人卻憶孝文賢。

李舜臣二首

舜臣字懋欽。青州樂安人。嘉靖癸未進士。授戶部主事。改吏部。歷員外。出爲江西提學僉事。改南國子司業。就遷尙寶卿。召拜太僕卿。有愚谷集十卷。

四庫總目。舜臣詩格雅飭。而頗窘於邊幅。所長所短。皆在於此。文皆古質。其序記多名論。而西橋逸事狀一篇。觸張璠。桂萼之鋒。直書不諱。文出之日。天下咋舌。抑亦剛正之士矣。

中麓閒居集。李空同有九子詩。率多詩文之友。予亦有友九人焉。詩文而兼經濟者也。勿論經濟。其詩文有可掩蔽前九子者焉。李愚谷舜臣。劉嵩陽繪。羅念菴洪先。呂江峯高。熊南沙過。唐荆川順之。趙俊谷時春。王遵巖慎中。潘春谷高。

送丁德卿出守撫州

康樂臨川日。江山屬壯遊。羨君今出守。於此復鳴騶。地以紅泉勝。亭餘碧澗幽。遙知詞賦手。千載揖風流。

寄任元朴

去國今三載。獨傳諫諍名。聖朝非爾棄。時俗乍相傾。迹向陶邱斂。書從梁獄明。平生欲何似。歲暮臥山城。

陸銓一首

銓字選之。鄞人。嘉靖癸未進士。除刑部主事。諫大禮廷杖。歷兵部員外。禮部郎中。出爲福建按察副使。歷廣西按察使。遷廣東布政使。有石谿集。

甬上耆舊集。石谿奇氣激元。真詩家之烏獲。

田按。選之議禮與羅峯不合。羅峯驟貴。氣凌朝士。排擠正人。選之挽羅峯詩云。此後正人方貼席。從前同黨幾張弧。笑君十載爲公相。不得徐生一束芻。可謂快論也。

度嶺後漸寒

初春戒羊城。氣煖親絺葛。度嶺春已杪。怯風襲冬氎。相去千里間。寒燠判如劃。物性亦從人。宜土乃易茁。橘柚常去燕。梨棗不榮粵。植根一失所。生意已先闕。奚爲冠裳驅。風土奪所悅。六氣爲人讐。變息苦伺隙。行行歸吾鄉。安栖養歲月。

顧夢圭四首

夢圭字武祥。崑山人。嘉靖癸未進士。授刑部主事。改南吏部。歷郎中。出爲廣東參議。改江西。歷山東。河南副使。福建參政。按察使。遷江西布政使。有疣贅錄二卷。

四庫總目。夢圭詩文。皆平正通達。直抒胸臆。無鉤章棘句之習。有明中葉風氣初更。蓋學問移於姚江。而文章未移於北地者也。

田按。武祥分守廣東雷廉。海北故有平江。青鷺。楊梅。樂民四珠池。詔書督採甚急。武祥疏言。海面珠池。道里遼絕。往歲開採。用舟筏兵夫萬計。往來海中。因以爲盜。近年劇寇黃山秀蔓延縱橫。覆轍可鑒。且珠蚌出海有漸。生息甚難。先朝率十五六年或十年一採。始得美珠。邇者三年再採。珠已耗竭。自非積久。欲得美碩繁顆。必不可得之數矣。况蜃戶腰紈入海。觸犯瘴霧。駢首就死。實可憫念。伏望亟賜罷採。以寬民力。不報。責貢如初。武祥有采珠歎詩云。漢家嬪嬙無麗飾。南海逍遙養泉客。昭陽新寵

門新妝。照乘之珠苦難得。孟嘗美政。龔黃班。今人反怨珠來還。璽書三年兩頒降。驪龍亦蚌皆愁顏。往時中官漉合浦。巧徵橫索如豺虎。中官去後璽書來。誰訴邊陲無限苦。野老村童不著禪。四山戎馬夜紛紛。竹房無瓦餅無粟。猶折山花迓使君。此詩可儷白香山新樂府矣。武祥疣贅集。長於古體。如灤縣行、獻縣行等篇。皆可採之。輜軒陳之太史者也。

崇安縣作

鵝湖始褰帷。延矚情未已。陟巘窮紆折。臨溪鑿清泚。修篁蔽雲屋。繁英間霞綺。飛瀑萬壑鳴。玄關百靈啓。征夫憚殊域。物色差娟美。緬懷通道初。於今乃同軌。言瞻九曲閭。秀石如瑜珥。鼓柁日紆徐。仍觀巖月起。

獻縣行

滹沱水決年復年。城北一望皆平川。田荒不聞免租稅。賣兒鬻女償官錢。百家今無十家在。老翁臘月衣無綿。編草爲船渡行客。破履深入層冰間。索錢買餅不充腹。終委溝壑何人憐。北地凋殘此爲最。來往況復多輜軒。我來正逢貴者至。橫須供張何喧喧。辛勤爲民省百費。路旁但稱曾令賢。曾令名德字日宣。

過信陽追悼大理卿孟公

江東舊游處。雲樹俱寂寞。篇翰空流傳。斯人不可作。嵩山洛水幾俊人。此鄉何孟名嶙峋。東閣梅花罷吟笑。落帽龍山迹已陳。我昔卑棲向南省。孟也邂逅情相親。秦淮命舟每清夜。冶城飛蓋當芳辰。歡娛未幾旋相失。楚天粵嶠疏音塵。英魂不逐彩霞散。或與黃鶴翔秋旻。我來故宅可羅雀。墓草忽復三經春。交呂

攀嵇如隔夢。山陽聞笛一露巾。

九江雨泊

家近書仍少。情繁夢不清。芝山連夜雨。春盡九江城。

柯維騏四首

維騏字奇純。莆田人。嘉靖癸未進士。授南戶部主事。有藝餘集十四卷。

東南嶠外詩話。希齋登第五十載。未嘗一日爲官。人品既超。詩遂似之。

田按。奇純撰宋史新編。竭二十餘年之力。可謂精專。詩亦蘊藉。不染塵氛。

別陳若寶

悠悠江上雲。盤盤澗中石。蹤迹亦何常。寸心詎能易。長亭一杯酒。相看意脈脈。別後長相思。留歡罄茲夕。

宏路驛

雨歇江天淨。山迴驛路遲。客愁新歲減。風物故鄉宜。花事餘梅蕊。樵歌掇竹枝。祇慙司馬病。深負好文時。

寄文衡山內翰致政歸山

海內論交久。清朝偶共逢。談詩山寺月。並馬禁城鐘。林臥余多病。吏情爾亦慵。相望隔秋水。芳訊託芙蓉。

九日集東山

登高直到石巖巔。滿目雲山秋可憐。僧影夕陽紅樹裏。蘆花野水白鷗前。寒天搖落仍幽事。淨社招攜有宿緣。共把深杯對叢菊。不妨短鬢趁流年。

李新芳一首

新芳字元德。長治人。嘉靖癸未進士。除淮安推官。改保定。入爲戶部主事。遷監察御史。有漳堃文集八卷。

四庫總目。新芳漳堃文集。講學之作多至三卷。詩亦濂洛風雅之脈。

送李容之赴密雲

東郭送行客。淒其風滿樓。冠裳兼晉楚。意氣極燕幽。對酒堃花落。隔林嘯鳥愁。雙旌去何疾。回首北山秋。

馮世雍二首

世雍字子和。江夏人。嘉靖癸未進士。歷吏部郎中。出爲杭州知府。改徽州。有三石集。

湖北詩徵傳略。世雍書法山谷。有奇氣。

登岳陽樓望洞庭

澤國雲蒸水滿湖。茫茫煙浪混虛無。波心明月澹將墮。海上浮邱閒可呼。巴客布帆歸鳥盡。湘靈瑤瑟暮峯孤。汀蘭沚蕙空相戀。恐有魚龍夜泣珠。

金陵春興

玉臺金闕帝王都。碧樹青山海嶽圖。瘦馬年年趨畫省。只將詩句詠蓬壺。

劉隅一首

隅字叔正。東阿人。嘉靖癸未進士。授福建道御史。出爲四川按察僉事。坐事謫。稍遷永平知府。歷河南副使按察使。以右僉都御史巡撫保定。入爲右副都御史。有範東集。

再過草堂

亭皋叢薄帶寒流。杜老祠堂江水頭。一代文章懸日月。幾年衰病託林邱。空園葉落松楸老。滿地雲陰鳥雀愁。我亦羈栖懷故國。時來江上寫離憂。

馬坤一首

坤字順卿。南通州人。嘉靖癸未進士。累官南戶部尙書。贈太子少保。有石渚集。

送沙溪姜二守擢清江藩府審理

三年佐郡著賢勞。又上樓船汎雪濤。粵檄江山歸陸賈。梁王賓客讓枚皋。海東棠樹陰連舍。驛路煙花色映袍。把酒旗亭愁送遠。西風衰柳苦蕭騷。

朱泚四首

澗字必東莆田人嘉靖癸未進士授湖廣道御史以言事廷杖放歸有天馬山房遺藁八卷

四庫總目澗詩不事鉛華獨抒懷抱家居三十餘年於民生國計切切不忘集中南洋水利之議山寇海寇之防指陳利病斟酌時宜委曲以告當事不以罷黜而膜視其爭誕節朝賀疏史僅刪存大略集中尙載其完本用以壓卷蓋自議禮諸臣獲罪後舉朝皆附新局澗與馬明衡惓惓故君尤其一生大節故編錄遺文者別爲一卷弁於集首云

蘭陔詩話損巖與馬師山同批逆鱗幸得不死歸隱天馬自謂罷官之歲適與靖節相符園中多植菊每開時必作數詩以紀歲月其詩春容和粹無窮愁牢騷語雖不規撫柴桑其興趣正自相同

東南嶠外詩話天馬山房編中有二石歌云英石出英嶺端石出端溪天生二石名天下寶愛直與琨瑤齊昨來端州過英德忽聽人言心惻惻窮山絕谷遠搜尋斧鑿之聲日千百持歸不敢爲家謀紛紛爭向官司投摩挲更與辨醜好身當此役何時休二州父母民之主詎忍生民受茲苦安得龍圖孝肅公手不持之目不覩此等詩有關繫粵東方志中尤宜大書而特書者也

禾稼在野人有更生之望喜而賦此

低田美禾稼高田饒黍菽豐歉味前期苦樂易翻覆貧者嗟已流死者不可復何當忍須臾待此歲月熟

寄竹坡施先生昆玉

尤川古邑佳山水雙峰巒岫水清泚地遠民風淑且閑漁釣還多隱君子薄遊已作廿年期只今魂夢長依依扁舟欲往關山阻一雁不來音信稀極目溪雲擁溪樹君遊是我曾遊處漫題短句送君行直把愁心向君去君到尤中見故人爲余傳語寄情親木蘭煙水壺公月短髮蓬鬆一角巾

扁舟沂木蘭宿西沖僧舍同馬師山和顧頤齋韻

坐愛山中靜。庭柯永日移。婆娑遊客影。消息野雲知。釋子何年住。溪光入畫奇。題詩鑿絕壁。應作後遊期。

題九霄深紅菊

幾朵深紅籬畔栽。幽香剛到一尊開。江村秋色涼如水。五柳先生歸去來。

盧襄一首

襄字師陳。吳人。嘉靖癸未進士。官兵部郎中。有五隴山房藁。

和贈頓戶部

三年再見頓叔養。昔在范水今神州。矯矯高姿同海鶴。悠悠野思傍汀鷗。未拋薄祿緣慈母。忽動新吟感素秋。花竹郊居石湖好。問君還肯卜鄰不。

王激二首

激字子揚。永嘉人。嘉靖癸未進士。除吉水知縣。入爲吏部主事。歷員外郎中。遷南右通政。改北。進國子祭酒。有文江、鶴山二集。

田按。子揚爲羅山壻。羅山柄用。以喜怒進退人。子揚能調護善類。脫其荼毒。其卒也。張唯靜爲刻鶴山集。鄭澹泉爲作小傳。稱其天資闊達。不屑曲謹。願以舅氏驟起驟廢。坐是抑鬱以卒。羅山素不喜余。非子揚禍且不測。使子揚以縣令歸山。潔志峻節。

心迹之際嶒然矣。顧其意亦欲委曲盤桓。救十一於千百。其爲正人憐惜如此。余徧檢明詩總集。無錄子揚詩者。偶於溫州志獲詩二首。亟登之。

稼軒

太平無稿勸東封。且爲明時作老農。歲事經營春信後。蓑衣料理雨聲中。百年自足江村味。一飽麤疇耒耜功。草澤行吟君莫問。遊人不是鹿皮翁。

喜歸雲峯山房

江上青山入望新。客衣初拂帝京塵。庭闈歲晚思歸養。雨露恩深許乞身。雲谷誅茅營別業。鶴山煮茗摘先春。莫言林下無居士。東絹新裁折角巾。

黃直一首

直字以方。金谿人。嘉靖癸未進士。授漳州推官。以疏請建儲下獄。謫沔陽州判。再劾邵元節。廷杖。戍雷州。隆慶初。贈光祿少卿。

羅漢洞

西風一蕭瑟。暇日暫遊山。花落亂鋪徑。雲來半掩關。流泉秋壑冷。疏磬晚龕閒。興盡自歸去。高僧猶未還。

方一蘭一首

一蘭字世佩。莆田人。嘉靖癸未進士。授刑部主事。改禮部。吏部。歷員外郎中。有少微堂集。
芝園定集。四皋方子詩。流藻繪於山川。播風標於簡冊。

留雲洞

望望瀨溪水。幽幽雲峯林。驅我輕車去。遲日載登臨。梧竹手移植。麋鹿相追尋。依依青楓樹。嚶嚶好鳥鳴。我興寄寥廓。斗酒聊自斟。解衣坐磐石。撫我膝上琴。他時畢婚嫁。長此棲雲岑。

鄭弼一首

弼字諧甫。莆田人。嘉靖癸未進士。歷工部郎中。出知雲南府。

夜坐

獨樹風漸生。四郊雨初歇。何處隔山鐘。聲聲帶明月。

黃禎一首

禎字德兆。安邱人。嘉靖癸未進士。授戶部主事。改兵部。進郎中。再改吏部。有北上。戶部。符臺諸集。

張貞渠邱耳夢錄。選部以人言免官家居。獨坐一小樓。日事吟詠。力追古作。

東田

東田陟蘭皋。別業山之麓。夕日銜嶺頭。山猿嘯東谷。颺颺晚風細。輕雲澹水木。曳杖尋友朋。溪月上茅屋。

葉良佩一首

良佩字敬之。台州太平人。嘉靖癸未進士。除新城知縣。改貴溪。入爲刑部郎中。有海峯堂。前藁十八卷。

靈谷菴讀道書

市居苦炎熱。逃住白石菴。閒眠讀道書。峯影垂重檐。緬邈三秀圃。深沉九龍潭。簫笙自幽細。風日還清酣。路逢王子晉。引致阿那含。親昵儻相問。餐霞隱終南。

金克厚一首

克厚字宏載。仙居人。嘉靖癸未進士。官刑部郎中。

遊天台

夜宿清溪覽桐柏。又從桐柏上瓊臺。仙人跨鶴歸何處。岩下碧桃花自開。

王度一首

度字律生。臨海人。嘉靖癸未進士。授兵部主事。歷員外郎中。出知建昌府。有石梁集。

望石樓

一路看山近石樓。十年詩興未曾酬。與君並馬談幽事。何日捫蘿到上頭。綠水平田初過雨。丹楓黃葉足

清秋年來蹤迹奔馳甚。聊向東溟學浪遊。

陳表一首

表字□□。新興州人。嘉靖癸未進士。官浙江道御史。

東湖驛題壁

雲峯日落暮猿引。江浦雨來歸雁忙。南入青山六十里。遙村烟樹影微茫。

吳鵬一首

鵬字萬里。秀水人。嘉靖癸未進士。授工部主事。累官吏部尙書。有飛鴻集二十卷。

次府江感懷呈劉憲使

上化灘前晚繫舟。黃茅嶺接楚雲秋。一天瘴雨來殘夜。千里蠻江有急流。短髮獨搔猿送淚。疏燈自照角添愁。卻憐留滯炎荒客。已似當年柳柳州。

毛衢一首

衢字大亨。吳江人。嘉靖癸未進士。官四川提學副使。有六泉集。

元旦在涪

年華催客鬢。春意動山城。草樹初添色。溪流不換聲。煖將椒酒媚。織送菜盤青。時序偏驚眼。江蘿愁與生。

徐獻忠一首

獻忠字伯臣。松江華亭人。嘉靖乙酉舉人。除奉化知縣。有長谷集十五卷。

松風遺韻。長谷集中五言。如林密交加樹。山迷去住雲。七言。門臨絕壁高於鳥。竹引泉流曲似蛇。別浦煙光分蟹舍。隔林晴日上魚梁。殊自可誦。

山居

高林深結宇。礙屋有停雲。秋至驚黃葉。蕭蕭不可聞。客從樵徑入。泉向石根分。日暮牛羊下。時同麋鹿羣。

錢楞一首

楞字介夫。臨海人。嘉靖乙酉舉人。官襄陽同知。

春日

桃花杏花紅滿溪。野老候予來杖藜。斷崖水落雨初歇。春晴日出鶯亂啼。酒盃入手醉不放。草色著眼望欲迷。最愛南鄰興更好。攜壺擬過石闌西。

孟思五首

思字叔正。濬人。嘉靖乙酉舉人。選南陽通判。未赴卒。有韻川集二十卷。

田按。龍川與謝四溟。盧次樞遊。詩名不甚著。於潦倒中。時有渾成合格之作。

愁

計拙甯爲隱。年衰未得閒。詩篇搔短髮。歲月落荒山。剝啄征徭急。尋常酒債艱。昔人何意適。瀨石弄潺湲。

暴雨

農事欣仍懼。天威暴暫迴。虹邊收斷雨。林外殷殘雷。薄暮酒杯進。小涼詩句催。西山足爽氣。倚仗看崔巍。

送盧次樞遊南都

秣陵春色早。行客路從容。酒醒江船月。詩成野寺鐘。鍾山雲氣紫。澤國浪花重。莫聽竹枝曲。令人歸興慵。

雨晴

五更鳴雨忽斷絕。清曉皎日懸林東。坐枝黃鳥嬌睨睨。落地杏花殘白紅。青青麥苗抽短隴。飛飛閒雲開遠空。欲出山田泥不可。拂琴呼酒對春風。

夜

獨坐空階對綺琴。微微露下寒來侵。西風落木此時夜。明月在天何處砧。楚調悠悠吹遠思。胡笳故故送哀音。問誰今作燕山將。莫懈防秋萬里心。

劉陽一首

陽字一舒。吉安安福人。嘉靖乙酉舉人。除碭山知縣。徵授御史。引疾歸。起光祿少卿不赴。

明詩紀事 戊籤 卷十五

書岡山

獨尋花徑覓幽居。借我書岡小結廬。十日西風人臥病。半床黃葉半床書。



明詩紀事卷十六

戊籤

龔用卿一首

用卿字鳴治。懷安人。嘉靖丙戌第一人及第。授修撰。歷諭德。終南國子祭酒。有雲岡選稿二十卷。
渡江訪陳德英中丞

曲岸橫橋通小溪。溪流清淺草萋萋。野花自落春歸去。澗戶無人山鳥啼。

袁袞十五首

袞字永之。吳人。嘉靖丙戌進士。選庶吉士。授刑部主事。改兵部。坐事下詔獄。編戍湖州。起南兵部主事。歷員外。出爲廣西提學僉事。有胥臺集二十卷。

四庫總目。袞詩不失體格。而特乏堅蒼。

藝苑卮言。袁永之詩。如王謝門中貴子弟。動止可觀。

田按。永之與王履吉皆服膺空同。履吉未達。私淑而已。永之使大梁。空同賦相逢行贈之。空同屬纊之日。遺言必袁生表墓。其子伯材書乞永之作傳。永之又有悼空同詩云。李公海嶽秀。長庚兆靈異。發穎由西陲。空羣眇北冀。摘詞迫子長。作賦凌賈誼。

虎視萬古前。鴻冥陋衰季。徐何抗英特。晚達勞指示。金聲叶鈞韶。兼總集能事。煌煌弘治間。文章準天地。抗疏逐城狐。挺節詆
關寺。八黨雖稽留。二張亦斂避。青蠅何羣飛。白首從吏議。淮南自狂謀。公也實奚累。繁臺昔攀嵇。龍門幸無棄。白馬聆雄談。朱
絃賞真趣。三復相逢行。綢繆伏高義。哲人竟山頽。仰止庶可企。永之詩。雄詞快句。下筆凌厲。而直易之篇。傷於易盡。無復頓挫
含蓄之妙。惟五律獨多合作。其與顧華玉論詩。謂四言必以三百篇爲法。而取材於漢魏。今玩集中。此體了無高唱。欲副斯言。
眇若河漢矣。

劉推官孟材過飲山樓

日掩山中扉。忽枉府中駕。登樓望澄湖。列宴臨虛榭。芳園榮槿葵。遠洲環桑柘。新篁冷風來。清陰滌煩夏。
誦君瑤華篇。逸思騁陶謝。蘭卮且獻酬。焉知卜其夜。

送沈山人玉父遊武夷

武夷三十六高峯。層巒削壁何重重。清溪九曲似明鏡。曲曲倒浸青芙蓉。仙人控鶴去已杳。沈生好奇快
幽討。禮斗壇前吹紫簫。昇真洞口探瑤草。幔亭宴罷寂無聞。何日虹梁度綵雲。仙籍倘書余姓字。齋心同
謁武夷君。

邵成都仲材過飲草堂醉贈短歌

君不見石崇金谷今安在。謝安東山陵谷改。人生忽若草頭露。河清海變誰能待。成都太守休嘆嗟。當年
同看長安花。一朝挂冠武林下。荷鋤學種青門瓜。世間翻覆無不有。浮雲富貴真芻狗。何用長存身後名。

祇須痛飲杯中酒。君家兄弟二陸才。黑頭早賦歸去來。古人往往困屠釣。我輩落落俱蒿萊。西湖春來淨如鏡。南峯北峯翠相映。六橋煙柳隱漁舟。孤山草樹迷樵徑。林逋逝矣不可攀。千秋放鶴何時還。與君笑傲拂衣去。流水桃花心自閒。

夏日莊居

門前新漲滿。恰好沒漁磯。下釣驚鵝浴。開簾放燕飛。納涼憑水檻。習靜掩山扉。蕭散無拘束。林泉志不違。飲芙蓉桂花下。

幽居屏人事。散步窺西園。愛此石上坐。獨開花下尊。迎風桂子落。照水芙蓉繁。日入且歸去。沈冥誰共言。

摘星樓

法界棲隋苑。星樓委廢臺。高秋躍馬望。遺事使人哀。池想龍舟戲。堤聞玉輦來。南朝歌舞地。何處不蒿萊。宿天界寺半峯房

殘照已全匿。空門猶半開。行人失歸徑。落葉厚蒼苔。暝色野煙合。寒聲山雨來。遠公應好客。宿鳥莫相猜。

靈巖

君王歌舞地。樵牧使人哀。土木遺危刹。丹青委廢臺。草當香徑合。花傍鹿場開。且盡登臨興。山河望裏來。

登寶華諸山

夙有登臨興。春遊愜賞心。山盤數嶺盡。寺轉萬松深。樹古同僧臘。泉多雜梵音。仙津何處問。卽此可投簪。

蓮蕩舟宴

新霽恍無暑。微風宜放船。捲簾親水鳥。解纜惜吟蟬。玉罍休停手。青房不論錢。晚來花霧裏。縹緲欲凌僊。

送顧秋官伯從赴留都

伯也今司直。西曹俗事無。簿書多暇日。山水羨清都。柳綠盧龍觀。花香玄武湖。莫辭刀筆恥。讀律乃通儒。

送僧歸金山

高僧何處住。孤錫向空飛。驛樹連天盡。江帆帶雨歸。潮聲喧講座。山色映漁磯。遙憶東林下。精廬隱翠微。

送慧公住持寒山寺

古寺人天外。精廬杳靄中。君依蓮社去。心與白雲同。溪水看清淨。寒山對苦空。何時聽說法。爲我暢玄風。

東齋

楓葉紛紛落。荒徑無人掃。萬念杳虛寂。閑門閉秋草。

野步

新月生西嶺。窈窕穿叢薄。林深不逢人。時有松子落。

蘇祐八首

祐字允吉。一字舜澤。濮州人。嘉靖丙戌進士。除吳縣知縣。改束鹿。入爲監察御史。遷江西提學副使。歷山西參政。遷大理少卿。以僉都御史巡撫保定。進副都御史。改撫山西。徵拜刑部侍郎。以兵部侍郎總督宣大。進兵部尙書。削籍。尋復官。有穀原集十卷。

四庫總目。祐詩音節琅琅。都無新意。

四溟詩話。陳一菴太守謫戍瓊州。每聞摺紳間盛稱蘇舜澤總制雪詩。初隨鳴雨喧相續。轉入飄風靜不聞。寫景入微。非老手不能也。

海嶽靈秀集。允吉詩。格不高而氣逸。調不古而情真。

明詩選。陳臥子曰。司馬詩。沈雄雅練。邊塞之篇。不愧橫槊。七律格律精嚴。聲調清亮。咄咄逸羣而上。

列朝詩集。允吉詩。益豪伉浪。奔放自喜。今人不復詳其風格。徒以其聲調叫號。近於雄渾。遂謂關塞之篇。不愧橫槊。何相者之舉肥也。

田按。舜澤詩是李何成派。昭聖太后輓章。忠愛悱惻。不愧詩史。可與朱必東諫慈壽誕辰疏并傳。

詠郭林宗

高張琴絕絃。暗投珠委路。嗟哉東都士。禍樞踵危步。穆穆郭林宗。深心託幽素。含章貞自抱。識微幾早悟。懿彼烝民章。明哲伊誰賦。

寄陳文晦侍御

良晤阻歡讌。停雲方在茲。東風吹野草。綠遍瓊華池。嚶鳴黃鳥聲。流轉綠楊枝。感物各有懷。婉孌惜芳時。攬轡眺連岡。迢遞滯前期。相思邈以緜。庶用證此辭。

戊寅元日

萬里王正月。千官漢侍臣。履端空鼓角。行在尙風塵。烽火新通代。鑾輿近向秦。已聞催羯鼓。夜半勅迎春。

河東道中

蒲坂水仍抱。首陽山故連。重華不可見。孤竹轉堪憐。煖色薰楊柳。春聲換杜鵑。河流日滾滾。百丈禹門前。

昭聖皇太后輓章二首

慈極空遺誥。僊輿去不還。千言臨內殿。萬姓哭深山。雉扇秋新掩。龍髯歲久攀。併將江上淚。霑灑泰陵間。

先帝留弓劍。千秋傷若何。竟違西內養。還葬北山阿。玉殿涵霜露。玄宮隱薜蘿。兩朝侍臣在。哭向白雲多。

真宗汾陰行宮有御製碑四金人

宋帝行宮汾水邊。翠華想像杳風煙。天書雲篆今何在。玉檢金泥竟不傳。伐石自鐫西祀日。渡河翻恨北征年。金人十二多零落。雙立猶看輦道前。

李牧祠下眺望作

泉源冰竇入春分。鳥語花香遲客聞。戍鼓寒沈龍塞月。夕烽晴照雪山雲。年來近野多戎壘。時過迴陽幾

雁羣險絕頗憐今昔地。無令但說李將軍。

張鏊一首

鏊字濟甫。南昌人。嘉靖丙戌進士。選庶吉士。改禮部主事。歷員外郎中。出爲浙江提學副使。歷遼東苑馬卿。廣東布政使。南太常卿。就改大理卿。擢刑部侍郎。進南兵部尙書。有遷鶯館集。

竹山洞

洞門虛敞幾重關。怪石玲瓏水竹間。滿地白雲流不住。仙家歲月自消閒。

陸埏一首

埏字秀卿。嘉善人。嘉靖丙戌進士。授南刑部主事。遷員外郎中。改北。再改南兵部。出爲常德知府。改武昌。再改岳州。擢太僕少卿。歷南鴻臚卿。就改光祿卿。以僉都御史巡撫河南。有簞齋集十卷。外集二卷。

四庫總目。徐階誌埏墓。稱埏讀書恥爲章句。嘗曰。人心與事物不相離。舍事物而徒求諸心者。俗學也。故集中有傳習錄存疑。不附和陸學。又有詩傳存疑。亦不盡墨守朱學。持論可謂篤實。詩文多近質朴。

訪柯侍御九華山留贈

趨朝同聽午門鐘。九陛森嚴虎豹雄。何事歸來化城臥。硯屏閒弄九芙蓉。

張子立一首

子立字原禮。黃人。嘉靖丙戌進士。除行人。擢湖廣道御史。累官僉都御史。巡撫延綏。謫戍固原。

黃花堡

關塞雄三鎮。風煙劇五戎。胡塵驚代北。漢月照雲中。戰士黃沙磧。將軍白玉驄。防秋烽火近。何日捷音同。

屠應竣四首

應竣字文升。平湖人。太保勳子。嘉靖丙戌進士。選庶吉士。改刑部主事。再改禮部。歷員外郎中。仍改修撰。歷侍讀。進春坊右諭德。有蘭輝堂集四卷。

四庫總目。應竣爲文善。比事屬辭。詩法汎濫諸家。時有獨造。然牽於華藻。蘊蓄未深。

泰泉集。漸山英穎天出。文不待蒐羅綴緝而自充遠。正誼發乎構思。浩氣動乎操觚。卓識烈於秋陽。危言皎乎金鏡。

明詩選。陳臥子曰。屠公典麗流暢。亦足名家。

靜志居詩話。諭德取材六代。具體初唐。爛若春葩。將以秋實。是衆作之有滋味者。

田按。漸山文長於摹古。上規兩漢。下效唐人。格雖沿古。而意取切今。非徒以字句爲藻繪者。詩亦有氣格。

上之回

上之回。乘六龍。龍文五色雲九重。參駕日月前。飛虹逐虜蕭關道。祀帝甘泉宮。別館迢迢與天通。屬車絡繹渭橋東。翻翻豹尾翔煙空。瑤池終燕歌秋風。歸來萬歲樂無窮。

夏日延綏捷至奉寄總制唐相公

北虜安危繫中原節鎮雄。君王親授鉞，相國坐臨戎。瀚海軍麾動，狼山轉戰空。遙聞六月頌，不數太原功。

送唐生

杖策欲誰親，侯門不禮賓。空彈馮氏鋏，莫救范睢貧。玉露凋紅樹，金風起白蘋。蕭蕭南去雁，飄泊自爲鄰。

朝陵

本朝宮寢居庸北，百二河山枕上都。隧道陰陰連大漠，金輿寂寂闕蓬壺。天留碣石爲華表，水繞桑乾作鼎湖。欲寫神功鑄嶧頌，窮崖絕壁倚天孤。

王格二首

格字汝化，京山人。嘉靖丙戌進士，選庶吉士，改永新知縣，遷刑部主事，改戶部，歷員外郎中，出爲河南僉事，坐事削籍，授太僕少卿致仕。有少泉集三十三卷。

田按：汝化盛有時名，詩多率意，不堪留賞。

燕

高棟鬱嶙峋，年年一度春。堂前知幾主，來埽畫梁塵。

望太室

中嶽遙開洛水濱。東風吹夢上嶙峋。二十四峯春寂寂。碧雲何處訪眞君。

陸粲四首

粲字子餘。一字浚明。長洲人。嘉靖丙戌進士。選庶吉士。改工科給事中。坐劾張璫、桂萼。謫都鎮驛丞。遷永新知縣。有子餘集八卷。

四庫總目。粲早入詞館。負盛名。洎官工科。以劾張璫、桂萼。偃蹇終身。亦緣是息意邱園。研心經史。學問具有根底。又爲王鑿門人。其授受亦有端緒。擔夫謠有香山新樂府遺音。未可以篇什無多。遂謂曾子固不能詩也。

弇州史料。貞山爲文。精雅有法。得班氏及韓、歐遺意。國雅。陸給事浚明長於古風。至近體云。無夜不成寐。有書空道歸。郡古留銅狄。堂深繡土花。又無因得似宮前柳。時有長條拂御衣。有句如此。亦李唐四傑之選。

黃宗羲明文海。貞山文秀美平順。不起波瀾。得之王文恪居多。乃歐陽氏之支流。

列朝詩集。子餘詩不多。獨出機杼。不落窠臼。

田按。世傳胡孝思爲蘇州太守。試士。賞拔王履吉爲第一。子餘少後。及子餘衡文浙江。孝思適爲參政。公燕日。相對忸怩。余檢子餘集。致天永胡公書。情致不淺。或世誤傳也。子餘以劾張桂。謫吾黔都鎮驛丞。驛舍廢。僦居平越。與郡人士講學。自是有掇科目者。子餘詩長於古體。存詩不多。咸自精美。以世多賞其文。故爲所掩耳。

邊軍謠

邊軍苦。邊軍苦。自恨生身向行伍。月支幾斗倉底粟。一半泥沙不堪煮。盡將易賣辦科差。顆粒那曾入鍋

釜官逋私債還未足。又見散銀來糶穀。去年糶穀揭瓦償。今年瓦盡兼折屋。官司積穀爲備荒。豈知剝肉先成瘡。近聞防守婺川賊。盡遣丁男行運糧。老弱伶俜已不保。何況對陣臨刀鎗。宛宛嬌兒未離母。街頭抱賣供軍裝。閭閻哭聲日振地。天遠無路聞君王。君不見京師養軍三十萬。有手何曾捻弓箭。太倉有米百不愁。飽食且傍枸欄遊。

送魏師召之蕪湖

魏子昨捧分司檄。與我青瑣門相逢。朱袍阜帽氣逾逸。佩刀左右雙盤龍。燕山雪消河冰泮。玉節辭天春未半。江東花滿姑孰溪。君到春衣應未換。謝公宅前芳草生。李白墳頭江更清。日出青山看舞鶴。月明采石聽流鶯。多君俊邁今無匹。四十爲郎頭正黑。文貞遺笏世珍奇。知古流風本仁直。都門送爾惜離羣。日暮行歌潞水雲。明年躍馬東城陌。楊柳青青正憶君。

上饒道中

桃花參差柳葉多。新雨灘頭生綠波。一夜東風吹驛舫。榜人齊唱弋陽歌。

長門怨

金屋承恩事已非。玉顏憔悴度春暉。無因得似宮前柳。時有長條拂御衣。

江以達一首

以達字于順。貴溪人。嘉靖丙戌進士。授刑部主事。歷郎中。出爲福建僉事。遷湖廣提學副使。有午坡集四卷。

上清祝聖逢孫默齋使君感贈。因期同陳午江。枉顧山中。

憶別無今日。生還有歲年。那期千里合。相見一潸然。往事秋雲外。幽懷落葉前。何時與同好。方駕枉林泉。

林雲同一首

雲同字汝雨。莆田人。嘉靖丙戌進士。選庶吉士。授編修。累官南工部尙書致仕。起南刑部尙書。未赴。贈太子少保。諡端簡。有讀書園集。

遊玉澗和他石韻

出郭神應豁。登臺氣益涼。風回青入座。澗曲碧流觴。林鳥迎風嘯。池荷映日香。碧筒猶屢勸。待月恣徜徉。

翁萬達三首

萬達字仁夫。揭陽人。嘉靖丙戌進士。授戶部主事。歷員外郎中。出爲梧州知府。歷廣西按察副使。遷浙江參政。改廣西。歷四川按察使。陝西布政使。以右副都御史巡撫陝西。進兵部侍郎。總督宣大山。山西保定軍務。歷左都御史。進兵部尙書。以事降兵部侍郎。兼右僉都御史。經略紫荊關。尋斥爲民。起兵部尙書。未赴卒。贈太子少保。隆慶中。追諡襄毅。有思德堂集二卷。

田按。尚書以武功著。不以詩名。而橫槊之餘。自饒豪氣。

鳳城水漲

四月潮城溪水漲。老鴉洲畔橋欲平。娟娟鷗鳥踏浪喜。短短竹枝搖水清。得風舡舸相對發。入暮蛟龍時一鳴。北來客子念歸久。棹月臨流雙眼明。

枳兒嶺

枳兒嶺上煙火微。枳兒嶺下行人稀。長風捲樹葉飛落。道是將軍射虎歸。

送胡思岩

沙日茫茫塞草黃。塞風獵獵暮天長。手拈羽箭故人贈。射殺陰山雙白狼。

李元陽三首

元陽字仁甫。大理太和人。嘉靖丙戌進士。除江陰知縣。徵授御史。出爲荊州知府。有中谿漫稿。豔雪臺稿。

田按。仁甫人楊門六子之一。詩品在弘山、愈光之次。

晚步戴氏園亭

小檻橫山色。幽居隔世氛。檐垂雙澗瀑。窗占五峯雲。竹影風前亂。花叢月下分。石鐺堪煮茗。遲客坐爐薰。

京都九日

兩度重陽逢客裏。蹉跎已覺賞心違。此時孤館堪流淚。何處高臺可振衣。黃菊向人徒自好。青山待我不能歸。茫茫塵海空奔走。欲傍沙鷗問息機。

別金陵泛舟懷南臺諸子

秋月雁空度。寒江舟自閒。時時回首望。何處是鍾山。

崔廷槐七首

廷槐字公桃。平度州人。嘉靖丙戌進士。授戶部主事。歷郎中。出爲四川僉事。有樓溪先生集三十卷。

田按。樓溪詩清脆可誦。

赤壁

嘉魚縣南石頭驛。石上大書赤壁字。龍涎蛟沫苔蘚封。點波猶帶風雲氣。攀蘿直上青林顛。千古封疆落眼前。英雄戰壘不可辨。但見萋萋江草凝寒煙。解衣沽酒楊花村。老翁擎出雙瓦盆。揮杯且弄山間月。弔古還招江上魂。黃州逐客玉堂仙。水落山高載酒船。片帆未挂臨皋岸。兩賦空令百代傳。

臨淄

山縣古臨淄。城塵淨晚颺。呼僮解寶劍。邀客換金卮。雲抱齊王塚。川回夏禹祠。不堪風雨夜。花落野棠枝。

王喬洞

鳧鳥朝元去。巖扉對日開。雲封春藥碓。花暗講經臺。挂壁猿猶至。衝煙鶴未回。何緣捐玉佩。從爾訪天台。

樓溪十景錄二

吾愛轆轤灣。清瑩鑑毛髮。中有避世人。臨流弄明月。
吾愛樓子石。秋水涓涓溜。循級下三疊。哀此雲和奏。

潼江

潼川江水抱村斜。兩岸青山似若耶。一葉小舟雙蕩槳。月明撐入刺桐花。

諸將

遼東傅瀚雖云老。猿臂猶彎兩石弓。獨倚營門無箇事。閒將獵騎捕黃熊。

田汝成四首

汝成字叔禾。錢塘人。嘉靖丙戌進士。授南刑部主事。歷員外。遷禮部郎中。出爲廣東提學僉事。降
滁州知州。遷貴州僉事。進廣西參議。有叔禾集十二卷。

四庫總目。汝成歸田後。盤桓湖山。搜別名勝。殊以風流自賞。其詩隊杖修整。娟娟秀出。然使逢大敵。則未足相當。

國雅田學憲叔禾學古才瞻網羅舊聞多所著述詩古體出入騷選頗沈鬱豪縱如探珠合浦夜光迫人往往眩目靜志居詩話叔禾詩品在范菁山江午坡間

田按叔禾宦遊所至撰炎檄紀聞歸田後撰西湖遊覽志及志餘可謂好事詩格不甚高時有俊語

萬民望久寓宜興詩以招之

浪迹名山恣遠探。白雲何處可停驂。鶴迷煙冷張公洞。花落春深玉女潭。玄酒未醑慚獨酌。丹經初試擬同參。爭如舊隱西湖曲。五柳毵毵杜草菴。

胡十八

新翻胡十八。急調出西涼。不入鷓絃細。能隨鵝管長。

憶張百戶一夔

不見西村張戶侯。惜花憐月近誰儔。南鄰酒伴應無恙。日日溪邊放小舟。

廣州竹枝詞

窄袖青衫白恰巾。波羅廟裏賽新春。聖童巫媪村村會。疊鼓鳴鑼拜海神。

樊鵬二首

鵬字少南。信陽州人。嘉靖丙戌進士。累官陝西按察僉事。有集。

田按少南大復弟子五言差勝。

大悲閣作宋太祖常駐驛在真定

寶閣開金地。雲梯上紫霄。君王留勝概。人代已三朝。晉水寒聲近。常山秋氣遙。如何憑檻處。還似翠華飄。

東林寺

遠公不可見。此寺乃東林。客路登臨地。浮雲世代心。門幽山霧集。逕曲野花深。夕坐焚香榻。惟聞鐘磬音。

聞人銓一首

銓字邦正。餘姚人。嘉靖丙戌進士。除寶應知縣。擢山西道御史。歷湖廣按察副使。有蘭芷集。

楊棧嶺

楊棧接高天。白雲山下看。花落雨餘雨。風吹寒食寒。縱目黃山外。停驂紫漢間。斜陽過廣惠。始覺有人寰。

范言一首

言字孔嘉。秀水人。嘉靖丙戌進士。除蒲圻知縣。改保定教授。歷國子監丞。遷大理府同知。有菁陽集。四音存稿。

湖上

誰開湖上閣。獨對晚來曛。鶯語排花出。潮聲帶雨分。遙看鄰牧散。閒與海鷗羣。自笑江干老。悠然臥白雲。

岑萬一首

萬字體一。順德人。嘉靖丙戌進士。歷官河南布政使。有蒲谷集。

秋江玩月歌

今夕此何夕。弄月江上秋。秋江水清淺。上有黃蘆洲。把酒問明月。清光今幾何。如何今年景。還比去年多。波光月色兩相射。與君玩之發浩歌。斟美酒。百千巡。鸕鷀解換玉樓春。竹間村犬吠。山風颯颯吹殘雲。漁笛一聲愁殺人。

郭鳳儀一首

鳳儀字□□。祥符人。嘉靖丙戌進士。累官按察副使。

送王後隅歸揚州用韻

維揚渺何許。引睇暮雲東。四月桐花老。扁舟出楚中。相思千里月。歸興一帆風。我亦懷鄉者。因君寄桂叢。

王宣一首

宣字敷言。臨海人。嘉靖丙戌進士。官御史。

日暮抵萬年寺

台山高不極。日暮倦躋攀。水向天邊落。人從雲際還。捫蘿轉絕壑。坐石俯深灣。檜竹禪房靜。逢僧意自閒。

祝文冕一首

文冕字□□。德興人。嘉靖丙戌進士。

檀嶽峯

檀嶽高如許。煙霞自往來。桃花馬頭落。莫認是天台。

陳仲錄一首

仲錄字子載。武陵人。嘉靖丙戌進士。除新城知縣。累官山東按察副使。有集。

德山寺和項節推韻

招提十載溯前遊。依舊青山枕碧流。鉢裏龍眠雲自遶。雨中花落鳥空愁。金仙勝界塵蹤絕。玉帶高風過客留。欲向山靈分半隱。題詩先上最高樓。

谷繼宗一首

繼宗字嗣興。歷城人。嘉靖丙戌進士。官知縣。

山左明詩鈔。王季木齊音詩。七子爲詩本四家。太常筆底盛煙霞。華峯一柱誇難盡。羣玉璘峴更滿車。注云。濟上之詩。以邊庭實爲鼻祖。若劉函山。李于鱗。許殿卿。谷少岱。不可勝數。濟南名士多。從昔然矣。

贖舊亭後有感

可憐一曲吟詩墅。棄作三年賣酒家。此日草堂歸舊主。傷心不見拒霜花。

李學詩一首

學詩字正夫。平度州人。嘉靖丙戌進士。累官中允。有桃花洞集。

聽菴

黯淡籬邊月。淒清竹裏風。草堂秋夜永。獨坐聽寒菴。

張鐸一首

鐸字西林。壺關人。嘉靖丙戌進士。選庶吉士。改三原知縣。遷戶部主事。改兵部。歷員外郎中。出爲湖州知府。有西林集。

崇雲寺

萬壑中開小有天。人傳卓錫已千年。蒼煙一抹丹崖合。靈石雙泉樹杪懸。貝葉翻時龍護法。蒲團入定虎參禪。一區靜土眞天設。社結青蓮共往還。

高遠一首

遠字近思。上元人。嘉靖戊子舉人。官汝州知州。有飲虹稿。

金陵瑣事。羽伯陳公評青溪社中四子詩云。高汝州近思。雄壯奇拔。馬國學承道。博雅典則。金文學子坤。清新秀朗。金孝廉子

有則兼總諸長詞義雙美。夫金氏昆玉尙有詩集。若高馬二公人且不知姓名也。况於詩乎。

弘濟寺

捫葛人從石壁行。入門坐久聽鐘聲。江豚吹浪出還沒。野鷺得魚棲復驚。孤嶺半遮春樹密。亂帆斜挂夕陽明。眼前似此流光美。不用登臨感慨生。

于玘一首

玘字子珍。東阿人。嘉靖戊子舉人。官平涼同知。有于氏詩略。

海嶽靈秀集。冊川詩爽慨近工部。

滄州

九月一日渤海郡。涼風落葉何紛紛。孤舟伏枕逢秋色。長路停樽對暮雲。荒草亂迷龔遂廟。清川曲抱獻王墳。古今蹤迹堪惆悵。獨向滄波弔夕曛。

孫宜五首

宜字仲可。華容人。嘉靖戊子舉人。有洞庭漁人集五十卷。

藝苑卮言。國朝學杜者。華容孫宜得杜肉。

國雅。孫漁人新聲奇調。河嶽隱淪之箕秀者。句云。嘯裏驚山鬼。談中有谷神。角應江聲起。雲兼海氣浮。其品當在李唐二孟之間。

列朝詩集仲可爲兒時得侍何仲默長而頌慕其風流上春官不第肆力詞賦以不朽自命自稱洞庭漁人與滇人張含秦人左國璣吳人黃省曾皆以老舉子有名於時仲可詩多至三千八百餘首王元美評詩云華容孫宜得杜肉余觀其詩剽擬字句了無意味求杜之片鱗半爪不可得而况其肉乎

靜志居詩話洞庭漁人詩滔滔莽莽下筆不休亦楚產之傑出者

苦雨走筆簡王生

城東草堂白晝開。洞庭主人騎馬來。昨當驟雨暗江縣。疾風迅雷中夜迴。堂前淤泥一尺深。欲往問子偕醉吟。蓑衣溼盡屐齒折。縱有美酒同誰斟。黑雲漸破雨漸微。青山映湖鷗出飛。花風宕煙晝漠漠。竹日澹影晴暉暉。我方臥病江城頭。君也磊落還舊儔。卽須度竹穿花去。爲買高歌伴醉遊。

閒居

苦憶南湖子。平生野興高。水傳滄海興。山有白雲謠。酒伴時相過。綸竿日自操。深居憐寂寞。飛夢故蕭蕭。

亭上對雨

對雨高亭暮。焚香獨院秋。水陰依檻合。雲氣隔城浮。蘿竹占寒意。漁樵送野謳。葛巾欹側久。隨地卽林邱。

江漲二首

五月六月雨不歇。章華城邊江水來。排山觸石須臾事。未道瞿塘滌瀨堆。洞庭南望接江鄉。九派波流日渺茫。更遣岷嶓連楚鄂。卽疑巴蜀是瀟湘。

顧聞一首

聞字行之吳人嘉靖戊子舉人。

岳岱今兩瑤華九嶷山人。才華瑋麗。鋪敘豐長。究其所歸。靡不有自。至於染翰。人稱並美。

清明日過楊村

楊柳蔽楊村。桃花古渡昏。清明猶作客。白日正銷魂。天地催時序。關河杖酒尊。何爲千里夢。一夜落吳門。

鄧遷一首

遷字世喬。閩人。嘉靖戊子舉人。官嘉興通判。有別駕集。

夜白紵歌

明月滿庭涼。夜時桂宮歌舞爲君施。纖腰嫋嫋聲遲遲。金蓮照耀光陸離。瓠犀螿首青蛾眉。銅壺玉漏夜何其。酌酒勸君君莫疑。人生樂在心相知。



明詩紀事卷十七

戊籤

羅洪先十一首

洪先字達夫吉水人嘉靖己丑第一人及第授修撰進左春坊贊善疏請朝東宮忤旨罷爲民隆慶初贈光祿少卿諡文恭有念菴集二十二卷

司勳集羅子習於道論卒爲詩病

胡直衡廬精舍藏藁念菴先生學凡三變而文亦因之少學文倣李空同棄之曰是未見端委者既入宮寮又與唐荆川趙浚谷相講磨大放於文久之語直曰吾無意爲之矣移答友人取譬於水曰古之人有能之者必其中有自得實見斯道之流行無所不在雖欲不爲波濤湍瀾之類不可得也

列朝詩集達夫詩文託寄可觀時人謂其早經廢棄久處民間往往深於致情易於興感殆亦近於言志者也

靜志居詩話達夫遠師擊壤近仿白沙定山然爽氣尙存未墮塵霧

田按達夫五言詩具有體格擅清遠之致惟語參講學時入擊壤一派

重至仙居寺

山雨鳴鐘餘阡陌斷行迹高刹隱回岡流潦汎春澤新構門巷更重臨歲月積訪禪草翳徑緡經塵在席

僧齋餘舊突。梵相懸頽壁。乍見驚夢寤。沈思悔形役。逝者今若何。躊躇增太息。

種蔬

謀生無遠術。樹藝有良時。嘉蔬來何遙。故人手致之。荷鋤出荆扉。荒榛力所披。景鬱苗易瘠。土薄根不滋。惡壤與敗株。能令蕃者衰。兢茲分陰功。日暮未辭疲。所欣寡逢迎。燃薪繼頽曦。黯黯開谷陰。柔芳亦離離。抱甕理晨夕。療饑方在茲。

種菊

結宇灌木下。庭除幽自閑。豈無豐草容。柔綠爭春妍。常恐秋風至。清霜凋故顏。萬族忻時榮。保終良獨難。惟此黃金花。可以結餘歡。

懷友

獻策動京華。還山種桂花。從知臥金馬。不及練丹砂。五月盧敖杖。三秋博望槎。伊人竟何在。歲歲望蒹葭。

寄楊實卿

燕歌別易水。蜀道隔湘雲。江柳年年綠。攀條獨憶君。嗚猿渺何在。來雁不堪聞。莫就成都卜。玄經自有文。

贈高洲劉述文

高洲似赤城。繞屋種黃精。溪水桃花色。煙林布穀聲。記年從漢魏。混世狎公卿。莫學劉郎隱。尋山更得名。

將入衡山貽李文輿

分袂懷蘭畹。飛帆倚桂舟。白雲何處所。綠樹是南洲。古嶽連雲起。清湘抱月流。鳳笙如可望。佇爾太清遊。

劉生

劉生多意氣。執別歲華深。一葦不肯渡。四愁空自吟。春江斜檻外。暮雨對峯陰。古調人多棄。泠泠鳴素琴。

同江

同江二月如潑醅。春水自上鵝洲來。一聲白鳥掠波去。無數好山當面開。漁樵苦說生事薄。笳鼓時聞驛使催。何日昇平棄檣散。扁舟應傍釣魚臺。

駕幸太學陪祀孔廟

萬乘出銅龍。千官扈蹕同。金根下星漢。翠葆麗春空。幄啓張皇邸。庭趨奠澤宮。詩因八佾變。是年去王號稱先師始用祀豈一牢豐。法駕橋門轉。周廬陛楯通。垂衣臨六館。委佩引羣工。見聖青衿合。橫經黼座東。嘉賓來聖裔。憲老憶申公。竊纂臣談業。躬逢帝典隆。辟離遲獻頌。紀事序王風。

南旺湖

百年風景茲奇絕。到處江湖卻欠詩。驢背不歸秋易老。黃花也解笑人癡。

程文德三首

文德、字舜敷。永康人。嘉靖己丑第二人及第。授編修。以事下詔獄。謫信宜典史。量移安福知縣。遷兵部員外。歷郎中。擢廣東提學副使。未赴。改祭酒。拜禮部侍郎。改吏部。再改南工部。以言事除名。萬歷初。追贈禮部尚書。諡文恭。有遺稿三十二卷。

芳桂

因君芳桂隴。懷予雙桂堂。秋風賦招隱。清夢到江鄉。

題畫

雲深地僻草堂開。門巷經旬長綠苔。何處故人驚午夢。溪橋拄杖帶琴來。

宿天遊菴

天遊忽上憑虛閣。洞宿仍分絕頂雲。夜靜千峯涼月白。吹笙疑是武夷君。

胡松四首

松、字汝茂。滁州人。嘉靖己丑進士。除東平知州。遷南禮部主事。歷郎中。出爲湖廣參議。進山西提學副使。就遷參政。以事斥爲民。起陝西參政。歷浙江按察使。進布政使。以右副都御史巡撫江西。進兵部侍郎。改吏部。遷南兵部尚書。徵拜吏部尚書。贈太子少保。諡恭肅。有集八卷。

同戚南玄渡江游宿長干諸山寺

桂館秋逾淨。荆扉晝不開。雨花飄法界。淪茗坐清齋。閣外江光動。檐前樹影來。禪心與鷗鳥。終日共徘徊。

桃川次韻

神仙丹洞古。樓觀白雲深。野鶴盤空下。江猿擁樹吟。地偏稀外事。坐久愜幽心。芟服終當製。行歌復弄琴。

山居雜興

隱几花千樹。看山石四鄰。翛然無一事。疑是葛天民。

旋途雜詠

花開煙嶼香風轉。霞映江波錦浪生。仙客船頭吹玉笛。不知何處是瑤京。

蔡雲程一首

雲程字亨之。臨海人。嘉靖己丑進士。授兵部主事。累官刑部尙書。贈太子少保。有鶴田草堂集十卷。

再遊雞鳴寺

城隱空中閣。林開象外天。松門芳草接。石磴碧蘿懸。花雨滋嵐翠。香雲覆澗泉。逢僧竹房裏。處處裊茶煙。

楊博一首

博字惟約。蒲州人。嘉靖己丑進士。除盩厔知縣。改長安。徵授兵部主事。歷員外郎中。出爲山東提

學副使。超拜右僉都御史。巡撫甘肅。進右副都御史。召拜兵部侍郎。經略薊州保定。遷總督薊遼保定軍務。歷右都御史。進兵部尚書。加太子少保。改總督宣大山西軍務。加太子太保。改薊遼總督。召還。加少保。改吏部尚書。進少傅兼太子太傅。少師兼太子太師。贈太傅。諡襄毅。有詩文集十二卷。

田按。襄毅敷歷九邊。屹爲重鎮。身繫安危者三十年。其送翟鑾行邊詩云。何似籌邊相。全收出將功。九霄雙赤鳥。萬里一彤弓。襟抱可想見也。

送雷侍御出按甘肅

繡斧西巡日。河關碧樹齊。九重勤一使。萬里慰羣黎。回紇識驄馬。番戎謝鼓鼙。還知登望處。威振玉門西。

鄭大同一首

大同。字皆吾。莆田人。嘉靖己丑進士。授行人。遷吏科給事中。歷都給事中。進南右通政。就遷太僕卿。歷太常。大理卿。擢刑部侍郎。贈尚書。有居俟堂集。

遊金山

九折趨溟渤。金山遠勢蹲。孤根出鼇窟。一柱控龍門。石露秋逾瘦。江平浪欲吞。蓬萊吾已得。應不數崑崙。

鄭綱一首

綱、字子尚。大同弟。嘉靖己丑進士。累官兵部侍郎。總督兩廣。

東南嶠外詩話。鄭葵山與兄于野同成嘉靖己丑進士。同登鄉貳。有黃田驛句云。春山入戶飛嵐溼。古樹當門白晝昏。可入畫稿。

秋懷

霜前疏柳蕭蕭落。水上寒雲泠泠浮。莫怪登樓賦懷土。秋風偏感仲宣愁。

林恕四首

恕、字道近。福州長樂人。嘉靖己丑進士。除□□知縣。遷都察院經歷。出爲雷州知府。累遷雲南按察使。有西橋集。

靜志居詩話。西橋近詩。依然林子羽。王安中流派。

滇南春暮寫懷

臺署春已歸。風雨連朝夕。庭幽花影沈。砌冷苔痕溼。愁人思轉深。啼鳥聲偏寂。悵望倚危欄。簾捲湖山碧。

過偏橋驛

牂牁戍壁鎖重環。疊嶂凌空擁翠鬢。萬里風塵連越雋。九溪煙火接荆蠻。星橋日落笳聲急。雲邏春深草色斑。聞道龍標圍未解。何人橫劍倚天山。

夜泊揚州

廣陵城外水雲幽，萬里歸程一葉舟。
山勢北來衝海斷，潮聲東去入河流。
瓊花觀裏春光去，楊柳塘邊野
色秋。休聽秦淮商女曲，阿儂亡國是迷樓。

遊崇信寺

巢雲方丈鎖潺湲，流水柴門永日關。
萬壑煙光秋雨後，一庭草色夕陽間。
香殘石鼎僧初定，簾捲巖扉鶴
未還。暫息雙林了真諦，倚闌邀月獨看山。

楊祐一首

祐字汝承，錢塘人。嘉靖己丑進士，選庶吉士，改刑部員外，出爲曹州知府，進江西僉事，改湖廣，有
丹泉集。

萬歷錢塘志：汝承詩清俊，能爲顏、鮑家言。

靜志居詩話：汝承諸體瀟灑拔俗。

郡齋自遣

丹泉野人木石姿，服官三十髮成絲。
逢人齟齬苦不達，閱世喧卑翻自疑。
礪田猶足飯黃犢，空谷能忘歌
紫芝。攬衣拔劍忽自笑，浮雲四顧茫何之。

吳子孝十首

子孝字純叔長洲人嘉靖己丑進士選庶吉士改台州推官遷廣平通判徵授南吏部主事改禮部遷光祿丞出爲湖廣參議有玉涵堂稿十卷

司勳集純叔玉涵堂詩綴詞婉以麗御氣雄以健抒思優以雋援事典以則振響和以平才情信美興寄尤深如汝官漳水北今得定州書工於發端塞空一雁去離思繞山河逸於終奏又雲來山閣風雨過石池秋大隱非人外微言乃道初月映蒼松逕雲生白石臺玉虛香火清齋地紫禁煙花悵望時獨有馮唐頭已白青袍郎署自年年並若神構足稱警策

靜志居詩話純叔藉甚詩名特格未高聳田按純叔詩語清新亦嘉靖中詞人之雋

韓陵行送人之上黨

春生具區水雲暗洮湖樹曉潮催兩槳君向韓陵去鄴下山川天下雄文章況有黃初風鬪雞晨出邙城北射獵宵歸漳水東君結豪英持一劍走馬韓陵如躡電賦詩應上三臺宮弔古須傷九華殿近聞惡歲土苗稀黃河不東民苦飢杞國懷憂竟何益念君此去何時歸

送沈潤卿還南陽

江南暑雨晝不開海霧上羃姑蘇臺臺前別有故人去驚濤疊浪爭喧豨君辭南陽雪初折吳門柳歲月來幾何長帆仍北首鄧尉山頭多桂枝虎邱石上攬瓊芝故園十載松楸淚楚國千年桃李辭粲爛華裾

曳來久。賜璧頒金陳醴酒。枕內曾書鴻寶方。座中誰在相如右。枚生老去戀梁王。清水豐雲道路長。千里月明堪悵望。洞庭霜橘待誰嘗。

金山

明月妙高臺。盤渦月照開。琳宮龍久駐。珠樹鶴曾來。雲霧空中靡。帆檣檻外迴。無言卷石小。江左擬蓬萊。

送僧之杭

餅鉢今何適。飄然向武林。江風吹衲影。山月照禪心。巢鶴形容古。祛蛇道術深。欲知無上義。南北兩高岑。

橘溪僧院

蟬聲不出寺。鐘斷祇聞香。流水迷松徑。間雲滿石牀。無言忘寂寞。宴坐得清涼。欲謝人間事。冥心叩藥王。

祇命拜陵出得勝門作

乍辭蓬閣下彤雲。風煖郊原草正薰。十里垂楊春澹宕。七陵佳氣曉氤氳。馬依輦路橋山側。鶯和錫簫曲水濱。回首故園誰麥飯。不堪愁絕倚斜曛。

送人使楚

長安七月雨不休。愛子持節凌清秋。水衡實少南方賦。傳吏須迎使者舟。廬岳雲霞迴席見。洞庭波浪接天浮。誰能詞筆誇三楚。遙憶仙人黃鶴樓。

題天池

竹疏漏雲色。泉細落嵐霏。日暮不歸去。山風吹客衣。

慈仁寺

寺前老柏不知歲。閣上風鈴欲語人。一榻秋窗槐影底。從教門外漲紅塵。

贈朱子羽之鉛山令

下馬愁腸劇轆轤。王喬今日去雙鳧。木蓮花發江南暮。君過靈山相念無。

楊本仁八首

本仁字次山杞人嘉靖己丑進士授工部主事改刑部歷郎中出爲江西按察副使歷湖廣參政遷廣西按察使有少室山人集二十五卷

田按少室山人詩不盡入格時有佳篇如披榛採蘭香韻獨絕

上元督府宴集

萬里逢元夕軍門春獨私江山俱是客燈火自深卮世局應難定鄉心不易持蒼梧今夜月流影鑒鬢眉

雨懷

愁絕經旬雨冷然池館清把杯春草色燒燭暮江聲雲裏天池寺湖邊滙浦城悠悠坐相繫清嘯不勝情

柏林寺灣

孤棧凌空雪後行。半山古寺晚鐘清。人從碧落窺丹壑。僧在白雲弄紫笙。翠柏不凋前代色。哀猿偏作異鄉聲。迴風落日江流急。匹馬千崖四望情。

巴人竹枝歌二首

院裏迎春郎手栽。花時郎繞百千迴。從郎去後春無主。縱有風吹花不開。江上帆檣亂不齊。煙波望望妾心迷。何如化作江中水。郎若東時儂不西。

上元命候吏折梅花

鄆江小吏誰家村。折得梅花枝半存。卻怪先生緣底事。上元時節不開尊。

四一亭對雨

逃暑何緣聊水坐。花眠竹困晚俱醒。隔雲遙揖匡南老。爲展插天九疊屏。

爲雪解嘲

春事江南異江北。年年雪裏放桃花。玉妃解識東皇意。細翦六英點絳霞。

沈愷四首

愷字舜臣。松江華亭人。嘉靖己丑進士。授刑部主事。歷員外郎中。出爲寧波知府。量移臨江。歷湖

廣按察副使進參政乞歸隆慶初起太僕卿不赴有環溪集二十六卷

田按環溪論詩皈依何李五言亦爽脫有致

暮冬寓山寺

冰霜驚歲晚寥落詎堪論。宦興懶於鶴冥修未到僧。風塵虛歲月城郭宛江村。忽憶環溪上寒梅幾處存。

歸思雜言

幾年羈宦轍一疏乞巖居。聖世容疏懶冥心只晏如。閒調吳苑鶴不食武昌魚。長日應無事蕭然讀素書。作吏二千石歸來無酒錢。苦心成白首岸幘向青天。止飲憐彭澤清遊憶朝川。塵心銷落盡吾意欲逃禪。

憶任城

春風一渡魯陽水夜月三更太白樓。安得四明狂客在金龜換酒散春愁。

崔涯一首

涯榜姓字若濟寧國太平人嘉靖己丑進士官監察御史以劾汪鋹罷官有筆山集十卷

和縣尹韻

移樽就溪石坐上東山月。老眼醉模糊天空水雲白。

陳子文一首

子文、字在中、閩人。嘉靖己丑進士。除麻城知縣。徵授戶部主事。歷員外郎中。出爲長沙知府。改池州。累遷湖廣按察副使。有于山堂稿。

送李主簿

相逢十年隔。相送復天涯。來折官河柳。行看岳縣花。千村連海嶼。萬井帶桑麻。異域今多事。殷勤問左車。

陳節之一首

節之、字尹和、閩人。嘉靖己丑進士。選庶吉士。授編修。遷春坊中允。

早朝

太平天子御飛籠。待漏趨跽拜九重。花落玉階仙露溼。柳垂金鎖御煙濃。螭坳漸集千官珮。曙色微催太液鐘。幸際明時慙補報。願陳三祝効華封。

胡經一首

經、字□□、廬陵人。嘉靖己丑進士。累官太常少卿。

遊鐵佛寺

夙愛南郊禪寺靜。孤吟落日戶長扃。春來好鳥答人語。老去枯僧如鶴形。雨漲溪光連霧白。雲開山色過江青。紛紛桃杏爭開落。春氣曛人尙未醒。

馮彬一首

彬字用光海康人嘉靖己丑進士官松江知府

採蓮曲

越江採蓮女綠袂紅裙照江水桂楫蘭橈破曉煙歌聲宛轉荷花裏儂家住在橫塘隈日出採蓮日暮歸只恐霜落荷衣敗看見鴛鴦對對飛

趙鯤一首

鯤字宇南壽張人嘉靖己丑進士累官貴州按察使有九嶺集

龍王關送家人歸

湖水北來曉色昏湖邊春草怨王孫微微樹影遮山閣脈脈泉流漱竹根羸馬衝泥尋浦路孤舟拖雨過江村臨淮欲灑思鄉淚一夜隨潮過魯門

周顯宗一首

顯宗字子孝濮州人嘉靖己丑進士除秀水知縣歷官漢中知府有桃村山人自適稿

真州工部分司

隱隱高城月冥冥晚市煙歸來人競渡棹入蓼花天

蔡鑿一首

鑿字天章寧晉人嘉靖己丑進士除行人擢浙江道御史坐劾汪鏞廷杖爲民尋以原官起用再謫山東按察知事隆慶初復職致仕有浚濱集十卷

送李樂菴赴池州司訓

依依楊柳暫停驂別酒何辭盡日酣此後相思成遠夢空隨明月到江南

張選一首

選字舜舉無錫人嘉靖己丑進士除蕭山知縣擢戶科給事中以諫帝不親祀太廟受杖削籍隆慶初復官進通政司參議有靜思遺集八卷

僧房

幽枝一聲鳥春滿萬家邨落葉蒼苔厚山僧只閉門

王表一首

表字邦正無錫人嘉靖己丑進士選庶吉士改戶部主事再改南禮部歷員外郎中有代弈稿消夏編

題雲山圖

長空湛秋碧。境與心俱閒。我屋東山下。白雲時往還。

程烈一首

烈字惟光。歙人。嘉靖己丑進士。官工部主事。有水部集。

越中送楊次山

楊子洛陽才。東風征騎催。鄉心杜曲里。官舍濟城隈。客路鶯千樹。離亭酒一杯。相思更相望。擬上越王臺。

史元中一首

元中號鹿泉。鄞人。嘉靖辛卯舉人。除靖江教諭。遷魚臺知縣。有青蓮集三十卷。

農舍

布穀聲新春已分。一犁好雨綠楊村。年來底事催租吏。未到秋成夜打門。

林垠二首

垠字天宇。閩人。嘉靖辛卯舉人。除桂陽知州。遷撫州同知。入爲戶部員外郎。有世牧堂稿。

登河北城樓

古戍烽煙息。孤城對水開。山從三晉出。川向五原回。遠樹依秦堞。殘雲沒漢臺。昔人遺恨在。臨眺有餘哀。

沙河行宮

宮殿連雲起。城樓入漢低。寒鴉如望幸。朝夕自悲啼。

唐鉞一首

鉞字君錫。蘭溪人。嘉靖辛卯舉人。除溧陽知縣。遷揚州同知。改楚府長史。

九日山亭

淮南秋老菊初叢。佳日登高上客同。雲岫盡含三楚色。石林遙撼九江風。池陽虎渡飛鴻外。姑孰龍山落照中。烏帽黃花兩羞澀。愁邊短鬢已如蓬。

黃中一首

中初名忠。字文卿。遂昌人。嘉靖辛卯舉人。除鉛山知縣。行取授貴州道御史。出爲山東按察副使。有南窗紀寢集。吹劍集。

田按。副使詩意取輕脫。間傷粗率。

過朱陽仲墓

江關詞賦舊淩雲。何事深山早築墳。天上豈真無李賀。人今猶自說劉蕡。西風歸鶴空留恨。落日啼猿不可聞。三十年前交誼在。獨來披草薦溪蘋。

強仕三首

仕、字甫登。無錫人。嘉靖辛卯舉人。授江西廣昌知縣。遷德州知州。有考槃寤歌、綺塋集。
盛明百家詩。甫登夙嗜詩學。嘗結會碧山吟社。

陸龜蒙

澤國多隱淪。天隨更孤峭。甫里三畝居。山水足幽討。揮翰木蘭堂。太守驚絕倒。拜賜散人銜。永寄羲皇傲。
秋晚山行小酌吟社

歸休無復事。日與野情宜。爲愛秋原淨。言尋山館期。散行塵外屐。疏響竹間棋。一遣沈冥理。詩成懶重題。
憶河豚

春城燈事動。河豚首登俎。身遠闔閭城。夢繞西施乳。

劉成穆三首

成穆、字玄倩。崇慶州人。嘉靖辛卯舉人。有劉玄倩集。

玉笥詩談。玄倩生七歲能詩文。十歲博識。十五究經史百家。談玄理。談兵。談世務。珠貫川絡。以春秋舉鄉試第三。試春官不第。發憤卒。玄倩於詩文初不經意。卽席揮穎。有甚佳者。

田按。元倩才藻。是李長吉一輩人。惜不永年。遺集今亦不傳。故所錄止此。

過漢武陵

歲暮霜殘過漢都。武皇陵墓舊荒蕪。不將玉匣藏天馬。猶使金燈照野狐。賦客詞園清露盡。仙翁丹竈白

雲孤千年惟有秋風曲。渭水長流啼野鳥。

玉筍詩談元倩過漢武陵詩升菴楊先生甚愛之。

過千佛巖和察罕廉訪韻

丹壁蒼巖青鐵楹。巖頭古溜苔蘚生。千年刻畫魚龍擁。白日陰冥麋鹿行。金草細搖蘿磴冷。玉魚橫過石梁清。臨流拊樹堪心折。野寺黃碑月二更。

溫泉宮

碧洞霜清臥火龍。翠華宮冷玉芙蓉。遊人綠酒流春殿。妃子霓裳化曉風。石閣獨逢明月醉。瑤壇虛有晚霞封。羽衣不見梨園曲。愁聽秦箏雜野蛩。

許炯八首

炯字彥韜。新會人。嘉靖辛卯舉人。有吾野漫筆十三卷。

田按彥韜自謂少時不慧。從羣兒騎竹馬。黏蜻蜓鳥雀為戲。未幾病若忽劇。夢一父老。出袖中書授之。俄墜而覺。自是遂能把筆作詩。頗近於怪。吾野集中詩率意一往。真漫筆也。披沙揀金。時有合作。亦自警拔。

厓山大忠祠

古祠牢落對行宮。朝市荒涼夕照中。玉璽久歸滄海去。銅駝空見碧苔封。已無抔土藏遺劍。猶有餘民泣

墮弓。一曲雍門歌不盡。滿山松柏起悲風。

螺川望文丞相墳

六歌聲斷市朝空。紫蓋黃旂散朔風。匡海有心同捧日。燕臺無路可從龍。蒼梧處處愁雲黑。杜宇年年怨血紅。江上孤墳勞望眼。古碑芳草夕陽中。

春日燕集同何檠樵作

佳客芳時不易逢。江南三月雨濛濛。酒當半醉半醒處。春在輕寒輕煖中。柳絮亂飄歌扇白。海棠如妬舞衣紅。晚來更按揚州調。聲繞吳姬翠袖風。

舟中書所見

黃葉隱溪橋。歸雲擁高樹。爲問蕩舟人。蒼煙是何處。

雲巢

幽人臥邱壑。相伴惟孤鶴。夜半山風來。時聞松子落。

三月晦日

東風無力近黃昏。花事蕭條半委塵。開到海棠還細雨。飛來江燕已殘春。

贈彈箜篌者

飛花無定水東流。繡幙春寒未上鉤。十四絃中新舊恨。一時彈作兩眉愁。

秋江晚眺

萬里滄江帶白沙。漁舟風起釣絲斜。水邊秋色無人管。半屬蘆花半蓼花。

黃省曾四首

省曾字勉之。吳人。嘉靖辛卯舉人。有五岳山人集三十八卷。

司勳集。勉之苞蓄既富。探汲不竭。譬玄黃雜組。而縹彩炫目。金石疊奏。而英韶盈耳。思劇沈幽。語罕仍襲。凡象外難摹之景。必鑄以新範。雖目前塵瑣之態。亦緣以華辭。

詩談。勉之詩宗六朝。如空江月明。獨鶴夜警。

藝苑卮言。黃勉之如假山池。雖爾華整。大費人力。

今雨瑤華。五嶽情鎔李杜。辭體梁陳。遊覽之餘。操觚靡倦。剪剔綺繡。咀嚼瓊瑛。每篇輟筆。粲然驚目。

國琛集。季父天藻獨富。學海滋深。其詩攬景輒取。摹事必得。時有神詣。使人意消。

列朝詩集。勉之六齡好緇素古文。解通爾雅。弱冠與其兄魯曾散金購書。置精藝苑。累舉不第。交游益廣。王新建講道於越。參預講堂。作會稽問道錄。馮元明振鐸成均。則又學於元明。名王馮兩家之學。李獻吉以詩雄於河雒。則又北面稱弟子。再拜奉。善而受學焉。獻吉就醫京口。勉之鼓柁往候。拜受其全集以歸。勉之文學六朝。好譚經濟。有五岳山人集。別擷西洋朝貢典錄。

輿地經。老子玉略諸書。皆未行於世。

田。勉之與獻吉書云。詩歌之道。天動神解。本於情流。弗由人造。故虞書顯爲言志。泗夏標之嗟歎。古人構唱。直寫厥衷。如

慧形。蓉生色堪把。意態各暢。無事雕模。末世風頹。矜蟲鬪鶴。遞相述師。如圖繪翦錦。飾畫雖妍。訓強先露。故實雖富。根莖愈也。千葩萬藥。不如一榮之真也。勉之所作。正坐斯蔽。所謂歎他人之未工。忘自己之已拙。至其文序事。頗復彬彬。亦學人之雅製也。

麗娟曲

佳人年十四。吹氣勝蘭香。一曲庭花落。餘音繞杏梁。龍綃纏紫袂。錦帳掩明粧。若非琥珀珮。焉得動君王。

黃家集夜思

窈窕大河陰。宵舟轉曲溇。星驂如客影。波箭學歸心。夢積俱緣想。愁來若解尋。鄉園明月滿。應待緯瑤琴。

遊清涼山

舊刹歡新陟。涼臺得煖攀。殿懸秋靄樹。江吐夕陽山。法食供遊饌。林杯悅旅顏。無勞支遁馬。碧草步人還。

虎邱詠

芙蓉近倚闔閭城。眺閣觴樓逐勢成。珠寺翻爲歌舞地。青山盡是綺羅情。巖花吐學紅粧麗。谷鳥嘯兼鳳管聲。十里垂楊芳草岸。四時常映彩舟行。

國家圖書館



004759338



. 86

5